

MESYUARAT KEDUA, PENGKAL PERTAMA  
PARLIMEN KEEMPAT BELAS  
2018

**HARI ISNIN : 10 DISEMBER 2018**

**DEWAN RAKYAT  
PEMBERITAHUAN PERTANYAAN  
MESYUARAT KEDUA, PENGGAL PERTAMA  
PARLIMEN KEEMPAT BELAS (2018)**

---

**PERTANYAAN : LISAN**

**TARIKH : 10 DISEMBER 2018 [ ISNIN ]**

**DARIPADA : DR HASSAN BIN BAHROM  
[ TAMPIN ]**

**SOALAN :**

**DR HASSAN BIN BAHROM [ TAMPIN ]** minta **PERDANA MENTERI** menyatakan usaha-usaha yang diambil oleh Kementerian untuk meneroka sumber-sumber baru wakaf. Wakaf adalah salah satu sumber pendapatan Negara, jika diurus tadbir dengan baik ia boleh membantu menyelesaikan masalah rakyat.

**JAWAPAN: (YB DATO' DR. MUJAHID BIN YUSOF, MENTERI DI JABATAN PERDANA MENTERI)**

Tuan Yang di-Pertua,

Kerajaan melalui Jabatan Wakaf, Zakat dan Haji (JAWHAR), Jabatan Perdana Menteri (JPM) telah melaksanakan sebanyak 18 projek pembangunan di atas tanah wakaf yang meliputi lima (5) kategori projek iaitu ekonomi (7 projek), pendidikan (5 projek), sosial (3 projek), perumahan (2 projek) dan kesihatan (1 projek).

Berdasarkan pengagihan ini, didapati sektor ekonomi mendominasi projek-projek yang dijalankan oleh JAWHAR. Ini bertujuan supaya harta wakaf

## SOALAN NO : 1

akan lebih berkembang dengan penjanaaan keuntungan jangka panjang dan ia dapat dimanfaatkan oleh lebih ramai sasaran.

Antara usaha-usaha lain dalam meneroka sumber-sumber baharu wakaf adalah melalui cadangan peluasan kategori projek pembangunan seperti perladangan, pertanian, air , elektrik dan tenaga. Perancangan di peringkat JAWHAR ini akan dibincangkan bersama institusi-institusi MAIN dalam mesyuarat-mesyuarat penyelarasan.

JAWHAR juga telah dan akan sentiasa mengadakan kerjasama strategik dengan *Government Linked Companies* (GLC), syarikat-syarikat swasta dan institusi kewangan bersama MAIN dan Yayasan Wakaf Malaysia (YWM) bagi meneroka sumber-sumber baru wakaf yang boleh menjana pendapatan dan seterusnya membantu menyelesaikan masalah rakyat.

Ahli-ahli Yang Berhormat sekalian,

Sebagaimana yang kita maklum, hal-ehwal berkaitan agama terletak sepenuhnya di bawah kuasa Sultan di setiap negeri dan Sultan mewakilkan kuasa tersebut kepada Majlis Agama Islam Negeri-negeri (MAIN) untuk bertanggungjawab dalam mengendalikan urusan tersebut termasuklah hal-ehwal berkaitan wakaf. Ini kerana perkara wakaf merupakan salah satu aspek harta keagamaan yang disenaraikan di bawah Senarai II, Senarai Negeri, Jadual Kesembilan, Perlembagaan Persekutuan yang diletakkan di bawah bidang kuasa negeri-negeri di Malaysia. Kementerian melalui agensi-agensi yang terlibat sentiasa berusaha dan berunding dengan pihak berkuasa agama negeri-negeri demi memaksimumkan penggunaan sumber wakaf yang berkesan dan memberikan manfaat yang signifikan kepada rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' SERI REEZAL MERICAN B. NAINA MERICAN**  
**[ KEPALA BATAS ]**  
**TARIKH : 10 DECEMBER 2018 (ISNIN)**

**SOALAN NO. 2**

**Y.B. DATO' SERI REEZAL MERICAN B. NAINA MERICAN [ KEPALA BATAS ]** minta **MENTERI KEWANGAN** menyatakan:-

- a. berapa sasaran amaun yang wajar dan bilakah penerbitan bon dan sukuk akan dilaksanakan oleh pihak Kerajaan; dan
- b. apakah contoh aset Kerajaan Persekutuan yang disifatkan sebagai tidak kritikal dan bukan strategik yang ingin dijual dalam masa terdekat ini.

**JAWAPAN**

Tuan Yang di-Pertua,

1. Keperluan pembiayaan Kerajaan Persekutuan diperoleh sebahagian besarnya daripada sumber dalam negeri menerusi penerbitan bon dan sukuk Kerajaan memandangkan kecairan tunai yang tinggi dalam pasaran kewangan domestik. Seajar dengan peraturan kewangan yang telah ditetapkan seperti yang termaktub di dalam Akta Pinjaman (Tempatan) 1959 [Akta 637] dan Akta Pendanaan Kerajaan 1983 [Akta 275], pinjaman hanya dibuat untuk membiayai perbelanjaan pembangunan dan membiayai semula hutang yang matang.

2. Dalam membuat pinjaman dari sumber luar pesisir pula, Kerajaan adalah tertakluk kepada Akta Pinjaman Luar Negeri 1963 [Akta 403] yang mengehadkan pinjaman terkumpul luar pesisir pada RM35 bilion. Kerajaan juga akan memastikan pendedahan yang minima kepada risiko tukaran mata wang asing di mana sehingga akhir September 2018, hanya RM21.4 bilion daripada jumlah hutang Kerajaan Persekutuan dalam beberapa denominasi mata wang asing.

3. Jumlah pinjaman bagi setiap tahun kewangan disasarkan melalui analisa dan kiraan yang dilaksanakan bersama Bank Negara Malaysia (BNM) setelah mengambil kira jumlah bayaran balik pinjaman serta anggaran defisit pada tahun tersebut. Untuk makluman Tuan Yang di-Pertua juga, pengumuman berkenaan jumlah terbitan domestik termasuk terbitan Sekuriti Kerajaan Malaysia (MGS) dan Terbitan Pelaburan Kerajaan Malaysia (MGII) akan dimaklumkan kepada para pelabur melalui laman sesawang BNM menerusi kalendar lelongan.

4. Bermula Januari sehingga akhir November 2018, jumlah pinjaman kasar yang dibuat menerusi terbitan bon dan sukuk Kerajaan adalah RM104.5 bilion, iaitu Sekuriti Kerajaan Malaysia (MGS) berjumlah RM49.0 bilion dan Terbitan Pelaburan Kerajaan Malaysia (MGII) adalah

sebanyak RM55.5 bilion. Daripada jumlah ini, sebanyak RM60.8 bilion adalah untuk membiayai semula pinjaman menerusi terbitan bon dan sukuk Kerajaan yang telah matang, manakala bakinya digunakan untuk membiayai defisit fiskal Kerajaan Persekutuan.

Tuan Yang di-Pertua,

5. Cadangan penjualan aset negara seperti tanah dan bangunan serta pengenalan rejim baharu cukai adalah antara langkah reformasi fiskal dalam mengurangkan hutang negara serta memastikan konsolidasi fiskal. Kerajaan sedang dalam proses mengenal pasti aset-aset yang boleh dijual, di mana aset-aset ini akan dijual melalui kaedah yang terbuka dan telus. Selain itu, Kerajaan pada masa ini masih lagi mengkaji potensi, sama ada untuk merasionalisasikan syarikat-syarikat yang mempunyai mandat penubuhan yang sama, menutup syarikat yang mempunyai beban fiskal kepada Negara atau melupuskan kepentingan Kerajaan dalam syarikat-syarikat yang mempunyai nilai komersil, memberikan kesan *crowding out* kepada penglibatan swasta dalam industri ataupun peranannya sudah tidak relevan dengan objektif awal penubuhannya.

6. Namun, pelupusan pegangan Kerajaan dalam syarikat-syarikat Kerajaan akan mengambil kira beberapa faktor termasuk nilai yang telah dicipta dalam syarikat, kepentingan komersial dan strategik kepada pemegang saham (Kerajaan) dan kemampuan pemilik baru untuk membawa syarikat yang akan dilupuskan ke tahap yang lebih baik. Justeru itu, pertimbangan dan keputusan untuk melupuskan atau memansuhkan mana-mana syarikat MKD akan dibuat berdasarkan kepada prestasi syarikat, peranan syarikat-syarikat Kerajaan ini dari segi mandat penubuhan, keperluan industri dan kemampuan syarikat untuk beroperasi, kesan kepada fiskal negara dan kesan terhadap penglibatan sektor swasta dalam industri serta lain-lain aspek yang perlu dikaji secara holistik. Kerajaan juga akan memastikan aset yang dijual kelak, mampu memberikan nilai terbaik atau *value for money* kepada negara. Di sini, perlu ditegaskan bahawa Kerajaan tidak akan menjual aset negara melalui kaedah *fire sale* agar dapat memperoleh nilai yang terbaik.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. AZMAN BIN ISMAIL [KUALA KEDAH]**

**TARIKH : 10 DISEMBER 2018 (ISNIN)**

**SOALAN NO. 3**

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan rancangan Kerajaan untuk memulihkan sungai-sungai kita yang tercemar, tersumbat oleh sampah sarap serta telah pupus hidupan air oleh pencemaran.

**JAWAPAN**

Tuan Yang di-Pertua,

Untuk makluman Ahli Yang Berhormat, berdasarkan kepada program pengawasan kualiti air sungai yang dilaksanakan oleh Jabatan Alam Sekitar (JAS) pada tahun 2017, didapati terdapat 51 batang sungai yang dikategorikan sebagai tercemar di seluruh Malaysia.

Bagi meningkatkan kualiti air sungai yang tercemar ini, Kementerian Tenaga, Sains, Teknologi, Alam Sekitar dan Perubahan Iklim (MESTECC) melalui Jabatan Alam Sekitar (JAS) mengambil pelbagai tindakan, di antaranya adalah seperti yang berikut:

- (i) Penguatkuasan dan pemantauan secara berkala ke atas sungai-sungai yang berisiko tinggi tercemar memang dikawal meliputi semua aspek dari peringkat perancangan penempatan industri,

### SOALAN NO : 3

penguatkuasaan berterusan, pengawasan dan program kesedaran dan pendidikan alam sekitar;

- (ii) Jabatan Alam Sekitar juga menjalankan operasi bersepadu dengan agensi-agensi seperti Jabatan Pengairan dan Saliran (JPS) dan Pihak Berkuasa Tempatan seperti Pejabat Tanah dan/atau Majlis Tempatan dan Badan Kawal Selia Air Negeri Johor (BAKAJ) bagi meningkatkan usaha pemuliharaan sungai-sungai yang tercemar;
- (iii) Kementerian ini juga mengeluarkan garis panduan merawat hasil aktiviti haiwan ternakan; dan
- (iv) Jabatan Alam Sekitar juga menjalankan pendekatan secara *soft* melalui program kesedaran dan pendidikan alam sekitar seperti Rakan Alam Sekitar melibatkan Ahli-ahli Parlimen dan komuniti setempat. Antara aktiviti yang dijalankan adalah berasaskan *community based outreach* seperti Hari Alam Sekitar Negara, Program Cintai Sungai, Kem Kesedaran Alam Sekitar, dan lain-lain. Selain itu, ceramah, taklimat dan pameran juga dilakukan meliputi kerjasama dengan agensi-agensi kerajaan yang lain, pihak-pihak NGO dan pihak swasta.

Sekian, terima kasih.



**PEMBERITAHUAN PERTANYAAN MESYUARAT KEDUA,  
PENGAL PERTAMA, PARLIMEN KEEMPAT BELAS,  
MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : DATUK DR. HAJI ABD. LATIFF BIN AHMAD  
(MERSING)**

**TARIKH : 10 DIS 2018 (ISNIN)**

**SOALAN:**

Minta **MENTERI PERTAHANAN** menyatakan :-

(a) berapakah jumlah pempamer luar negara yang telah bersetuju untuk turut serta dalam LIMA'19 tahun depan. Adakah terdapat peningkatan berbanding dengan pameran siri lepas ; dan

(b) apakah impak kepada proses peningkatan pembangunan pertahanan negara dan serta proses modenisasi ATM.

**JAWAPAN:**

Tuan Yang di-Pertua,

Pameran Maritim dan Aeroangkasa Antarabangsa Langkawi (LIMA) merupakan program nasional yang dilaksanakan secara dwi tahunan sejak tahun 1991 dan LIMA`19 yang akan dianjurkan pada 26 hingga 30 Mac 2019, merupakan penganjuran kali yang ke-15.

Sehingga 30 November 2018, sebanyak 130 pempamer luar negara telah bersetuju untuk menyertai pameran LIMA`19. Angka ini dilihat lebih tinggi berbanding hanya 64 pempamer luar negara yang

#### SOALAN NO : 4

menyatakan persetujuan untuk tempoh masa yang sama semasa LIMA`17. Peningkatan penyertaan pempamer dijangka akan terus meningkatkan sehingga pameran berlangsung. Bagi LIMA`19, Kementerian mensasarkan 260 pempamer luar negara yang akan menyertai pameran tersebut. Secara keseluruhannya, Kementerian yakin dapat mencapai 600 pempamer untuk menyertai LIMA`19 iaitu peningkatan sebanyak 8% berbanding 555 pempamer semasa LIMA`17.

Penganjuran pameran LIMA sejak tahun 1991 telah menyumbang secara langsung dan tidak langsung kepada peningkatan pembangunan pertahanan negara. Ianya dapat dilihat dengan kerjasama industri pertahanan tempatan dan industri pertahanan luar negara yang berkembang dari semasa ke semasa. Pelaburan jangka masa panjang dan usahasama ini diperkukuhkan dengan perjanjian-perjanjian persefahaman dan kontrak yang ditandatangani semasa LIMA berlangsung.

Melalui Pameran LIMA ini juga, Kementerian dapat menilai perkembangan teknologi terkini serta dapat membuat kajian pasaran (*market survey*) ke atas aset-aset ketenteraan. LIMA turut memberi peluang bagi semua perkhidmatan ATM untuk melihat kemampuan dan teknologi pertahanan terbaharu serta memperhalusi spesifikasi pesawat dan aset maritim khususnya melalui penyertaan oleh syarikat-syarikat pertahanan luar negara.

Justeru itu, kementerian dan ATM percaya bahawa penganjuran pameran LIMA berjaya dijadikan sebagai antara rujukan dalam meningkatkan pembangunan dan proses modenisasi ketenteraan melibatkan aspek maritim serta udara.

**SOALAN NO : 5**

**MESYUARAT KEDUA, PENGGAL PERTAMA  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN : LISAN**

**DARIPADA : YB TUAN SANISVARA NETHAJI RAYER A/L RAJAJI**

**KAWASAN : JELUTONG**

**TARIKH : 10 DISEMBER 2018, ISNIN**

**SOALAN :**

**YB TUAN SANISVARA NETHAJI RAYER A/L RAJAJI** minta **MENTERI KERJA RAYA** menyatakan bilakah Kerajaan dijangka akan memberhentikan kutipan tol di jambatan Pulau Pinang pertama dan Lebuhraya Utara Selatan seperti yang telah dijanjikan dalam manifesto Pilihanraya Umum ke-14.

**JAWAPAN :**

Tuan Yang Di-Pertua,

Sebagaimana Ahli Yang Berhormat sedia maklum, janji ke-6 dalam Manifesto Pakatan Harapan ialah untuk mengkaji semula semua perjanjian konsesi penswastaan lebuh raya tol dan berunding bagi mendapatkan harga terbaik secara kaedah menang-menang untuk mengambil alih setiap konsesi tol.

Pada halaman 29 manifesto Pakatan Harapan itu telah digariskan bahawa Kerajaan akan mengambil alih konsesi lebuh raya dengan memberikan pampasan adil kepada syarikat konsesi. Ini bagi tujuan mencapai matlamat akhir prinsip manifesto berkenaan iaitu untuk menghapuskan kutipan tol secara berperingkat.

Tuan Yang Di-Pertua,

Untuk makluman Dewan Yang Mulia ini, Kerajaan Pakatan Harapan sentiasa berusaha untuk mencari jalan bagi mengurangkan kadar tol dan memansuhkan kutipan tol semua lebuh raya, termasuklah Lebuh raya Utara Selatan dan Jambatan Pulau Pinang. Ini akan dilaksanakan setelah kewangan Kerajaan berada pada tahap yang stabil dan mengizinkan.

Sehubungan itu Jemaah Menteri pada 31 Oktober 2018 yang lalu setelah menimbangkan hala tuju industri lebuh raya bertol di negara ini - telah bersetuju memutuskan supaya Kementerian Kerja Raya diberikan tempoh masa 6 bulan untuk mengemukakan cadangan mekanisme terbaik untuk mencapai matlamat tersebut.

Untuk tujuan itu, Kementerian Kerja Raya akan melantik juru perunding audit bebas bertauliah pada **awal bulan Januari 2019** bagi membantu Kerajaan menganalisis data dan cadangan berkenaan. Ini termasuklah mengemukakan cadangan mengurangkan beban tol secara jangka pendek, jangka sederhana dan jangka panjang. Hasil kajian itu dijangka akan dibentangkan untuk pertimbangan dan persetujuan Jemaah Menteri pada bulan Mei 2019 nanti.

Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL PERTAMA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**  
**15 OKTOBER HINGGA 11 DISEMBER 2018**

**PERTANYAAN : LISAN**

**DARIPADA : DATO' NGEH KOO HAM [ BERUAS ]**

**TARIKH : 10 DISEMBER 2018 (ISNIN)**

**SOALAN :**

**Dato' Ngeh Koo Ham [ Beruas ]** minta **MENTERI INDUSTRI UTAMA** menyatakan tindakan-tindakan yang telah dan sedang diambil untuk mempertingkatkan harga minyak kelapa sawit dan menggalakkan industri-industri bahan-bahan sampingan daripada buah dan pokok kelapa sawit.

**JAWAPAN**

Tuan Yang di-Pertua,

Kerajaan sentiasa proaktif dalam usaha untuk mempertingkatkan harga minyak kelapa sawit serta daya saing industri sawit melalui inisiatif-inisiatif seperti persijilan Minyak Sawit Mampan Malaysia (MSPO) yang akan dijadikan mandatori menjelang pada 1 Januari 2020. Langkah ini diambil bagi meluaskan akses pasaran minyak sawit tempatan ke peringkat global dan ia dijangka akan memberi kesan secara langsung ke atas peningkatan harga. Melalui MSPO juga, produktiviti pengusaha sawit dapat ditingkatkan melalui Amalan Pertanian Baik (GAP) dan mampan. Kerajaan juga sedang berusaha agar persijilan MSPO ini mendapat pengiktirafan antarabangsa melalui rundingan dan kerjasama bersama badan persijilan antarabangsa. Selain itu, Kerajaan turut berusaha meningkatkan permintaan khususnya di pasaran-pasaran baharu dengan

mempergiatkan aktiviti penyelidikan dan pembangunan (R&D) bagi memberi nilai tambah kepada produk-produk hiliran sawit.

Kerajaan akan meningkatkan penggunaan domestik produk sawit melalui pelaksanaan program Biodiesel daripada B7 kepada B10 pada tahun hadapan. Selain membantu meningkatkan penggunaan minyak sawit, langkah ini juga dapat menyumbang kepada pengurangan stok minyak sawit dan seterusnya memberi impak yang positif kepada harga.

Selain itu, Kerajaan juga menggalakkan penanaman semula pokok sawit yang tidak lagi produktif ketika harga komoditi berada pada paras yang rendah bagi mengurangkan stok minyak sawit dan seterusnya menstabilkan harga di pasaran.

Tuan Yang di-Pertua,

Bagi menggalakkan industri bahan-bahan sampingan daripada buah dan pokok kelapa sawit terus diguna pakai dalam industri, Kerajaan telah mengenal pasti akan potensi yang boleh dihasilkan daripada bahan-bahan tersebut melalui inisiatif tambah nilai dalam industri makanan, bukan makanan dan makanan ternakan seperti berikut:

i. Industri bahan sampingan sawit (biojisim sawit)

Kerajaan melalui MPOB sedang membangunkan dan mengkomersilkan produk-produk bio-komposit seperti papan lapis, *palmwood*, papan gentian serta papan serpai (*particle board*) yang diperbuat daripada batang kelapa sawit. Disamping itu, MPOB juga turut membangunkan bahan kimia-hijau (*green chemical*) seperti selulosa bagi aplikasi di dalam produk-produk industri dan makanan.

ii. Industri makanan ternakan

Kerajaan melalui MPOB juga sedang menjalankan projek penyelidikan dedak isirong sawit, lemak sawit, buah tandan kosong dan pelepah sawit dalam formulasi untuk makanan haiwan ternakan seperti ayam pedaging, ikan tilapia, kambing dan lembu pedaging serta lembu tenusu.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' MOHD. NIZAR BIN HAJI ZAKARIA  
[ PARIT ]**

**TARIKH : 10 DISEMBER 2018 (ISNIN)**

**SOALAN NO. 08**

Minta **MENTERI PENDIDIKAN** menyatakan :-

- (a) berapakah statistik Graduan Ijazah Sarjana Muda Pendidikan Awal Kanak-kanak yang masih belum mendapat panggilan temu duga oleh Suruhanjaya Perkhidmatan Pendidikan (SPP); dan
- (b) apakah tindakan yang telah diambil oleh Kementerian bagi menyelesaikan isu Graduan Ijazah Sarjana Muda Pendidikan Awal Kanak-kanak yang tidak dipanggil temu duga sejak enam tahun lalu.



**JAWAPAN (a) DAN (b)**

Tuan Yang di-Pertua,

Penempatan graduan pendidikan termasuklah graduan Pendidikan Awal Kanak-Kanak di sekolah-sekolah Kementerian Pendidikan Malaysia (KPM) adalah berasaskan kepada kekosongan jawatan mengikut opsyen pengajaran, dan graduan yang lulus temu duga pelantikan sebagai Pegawai Perkhidmatan Pendidikan (PPP) oleh Suruhanjaya Perkhidmatan Pelajaran (SPP). Berdasarkan rekod pada 1 Oktober 2018, terdapat 71 graduan lepasan Institut Pendidikan Guru Malaysia (IPGM) opsyen Pendidikan Awal Kanak-kanak yang telah bergraduasi pada Jun 2018. Urusan temu duga telah dilaksanakan oleh SPP pada Oktober 2018 bagi penempatan pada awal sesi persekolahan tahun 2019.

Untuk makluman Ahli Yang Berhormat, Institut Pendidikan Guru Malaysia (IPGM) telah dipertanggungjawabkan untuk menyediakan latihan perguruan dalam bidang Pendidikan Awal Kanak-kanak bagi mengisi keperluan perjawatan dan bekalan guru prasekolah di sekolah-sekolah rendah kendalian KPM. Justeru itu, KPM memberi keutamaan untuk menempatkan graduan Institut Pendidikan Guru dan graduan tajaan KPM kerana latihan mereka telah diunjurkan lebih awal oleh KPM. Walau bagaimanapun, bagi graduan Pendidikan Awal Kanak-Kanak daripada institusi-institusi lain termasuk universiti awam masih diperlukan oleh tadika dan taska dari agensi di luar KPM mahupun swasta.

Sekian, terima kasih.

RJM158

**NO. SOALAN: 9**

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB Tuan Prabakaran A/L Parameswaran  
[ Batu ]**

**TARIKH : 10 Disember 2018 (Isnin)**

**SOALAN : 9**

**Tuan Prabakaran A/L Parameswaran [ Batu ]** minta **PERDANA MENTERI** menyatakan atas dasar apakah Kementerian menetapkan harga bagi setiap caj perkhidmatan Pesuruhjaya Sumpah.

**JAWAPAN: YB DATUK LIEW VIU KEONG,**  
**MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, kuasa pelantikan seseorang Pesuruhjaya Sumpah merupakan kuasa mutlak Yang Amat Arif Ketua Hakim Negara di bawah subseksyen 11(1) Akta Mahkamah Kehakiman 1964 [*Akta 91*]. Di bawah subseksyen 11(2) Akta 91, Yang Amat Arif Ketua Hakim Negara boleh membuat kaedah-kaedah bagi pelantikan, kelakuan, dan fi yang hendak dikenakan oleh, dan bagi semua perkara yang bersangkutan dengan, Pesuruhjaya Sumpah dan orang yang dilantik olehnya di bawah subseksyen 11(1) Akta 91.

Sebelum 1 Mac 2018, undang-undang yang mengawal selia Pesuruhjaya Sumpah di Malaysia ialah Kaedah-Kaedah Pesuruhjaya Sumpah 1993 [*P.U.(A)71/1993*].

Walau bagaimanapun, selaras dengan keperluan undang-undang semasa untuk mengawal selia Pesuruhjaya Sumpah dan perkara yang bersangkutan dengannya, Pejabat Ketua Pendaftar Mahkamah Persekutuan Malaysia telah mendapatkan pandangan dan maklum balas daripada wakil-wakil Pesuruhjaya Sumpah dari seluruh negara, wakil-wakil dari pihak Jabatan Peguam Negara, Majlis Peguam Malaysia, Persatuan Peguambela Sarawak dan Pertubuhan Undang-Undang Sabah berhubung dengan apa-apa cadangan penambahbaikan baginya.

Hasil daripada maklum balas yang diterima dan selaras dengan kuasa di bawah subsekyen 11(2) Akta 91, Yang Amat Arif Ketua Hakim Negara telah bersetuju untuk menggantikan Kaedah-Kaedah Pesuruhjaya Sumpah 1993 dengan menggubal Kaedah-Kaedah Pesuruhjaya Sumpah 2018 [ *P.U.(A)67/2018*] yang telah kemudiannya diwartakan dan berkuat kuasa pada 1 Mac 2018.

Melalui Kaedah-Kaedah Pesuruhjaya Sumpah 2018, peruntukan undang-undang mengenai Pesuruhjaya Sumpah telah dikemas kini dan diperkasakan. Antara lainnya, fi yang boleh dikenakan oleh seseorang Pesuruhjaya Sumpah telah dinaikkan daripada RM4 kepada RM10 (bagi affidavit asal dan dokumen ikrar, akuterimaan, surat ikatan atau surat cara lain), RM2 kepada RM5 (bagi ekshibit yang disebut di dalam affidavit asal, pendua atau salinan affidavit dan pendua atau salinan dokumen termasuk ikrar, akuterimaan, surat ikatan atau surat cara lain) dan RM1 kepada RM2.00 (bagi pendua atau salinan ekshibit).

Kenaikan fi ini adalah berdasarkan faktor-faktor berikut:

- (a) fi yang dikenakan di bawah Kaedah-Kaedah Pesuruhjaya Sumpah 1993 tidak pernah dikaji atau dinaikkan selama 25 tahun;
- (b) fi di bawah Kaedah-Kaedah Pesuruhjaya Sumpah 1993 adalah terlampau rendah. Sebagai perbandingan, suatu caj fi perkhidmatan bagi mengaku saksi satu affidavit di Singapura

adalah \$25.00 jika dibandingkan dengan RM4.00 di Malaysia;  
dan

- (c) bagi meningkatkan nilai fungsi seseorang Pesuruhjaya Sumpah, iaitu setiap perkhidmatan yang diberikan meliputi penerangan berkenaan dokumen dan akuan sumpah kepada setiap deponen, mencatat butir-butir perkhidmatan ke dalam buku daftar dan menyelenggara dan menyimpan Buku Daftar.

Sekian, terima kasih.

**PEMBERITAHUAN PERTANYAAN DEWAN RAKYAT**

**PERTANYAAN : JAWAB LISAN**

**DARIPADA : DATO' MASIR KUJAT [ SRI AMAN ]**

**TARIKH : 10 DISEMBER 2018 (ISNIN)**

**SOALAN : 10**

**PR-1412-L01447**

**Dato' Masir Kujat [ Sri Aman ]** minta **MENTERI KOMUNIKASI DAN MULTIMEDIA** menyatakan berapa banyak menara Telekom yang telah dibina di Parlimen Sri Aman dari tahun 2013 – 2018.

**JAWAPAN:**

Tuan Yang di-Pertua,

1. Untuk makluman Ahli Yang Berhormat, di bawah inisiatif Peluasan Liputan Selular dan Jalur Lebar Mudah Alih, pihak Kerajaan sentiasa berusaha menambahbaik capaian komunikasi melalui jalur lebar talian tetap dan mudah alih terutamanya di kawasan luar bandar di seluruh negara termasuk kawasan Parlimen Sri Aman.
2. Sejak tahun 2013, pihak Kerajaan telah membina sebanyak 9 menara komunikasi baharu, manakala tambahan 2 menara lagi sedang dalam peringkat pelaksanaan yang dijangka akan siap sepenuhnya menjelang suku kedua 2019.
3. Ini juga merupakan tambahan kepada 28 menara komunikasi yang telah dibangunkan secara komersial oleh syarikat pemberi perkhidmatan telekomunikasi di kawasan Parlimen Sri Aman yang menyediakan perkhidmatan jalur lebar mudah alih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN HAJAH NATRAH BINTI ISMAIL  
[ SEKIJANG ]**

**TARIKH : 10 DISEMBER 2018 (ISNIN)**

**SOALAN NO.11**

Minta **MENTERI PENDIDIKAN** menyatakan sama ada pihak Kementerian berhasrat untuk memberikan kuasa autonomi kepada kesemua IPTA di Malaysia.

**JAWAPAN**

Tuan Yang di-Pertua,

Untuk makluman Ahli Yang Berhormat, dari sudut perundangan, semua universiti awam (UA) merupakan Badan Berkanun Persekutuan yang mempunyai kuasa autonominya sendiri. Dalam konteks Kementerian Pendidikan Malaysia, autonomi merupakan salah satu agenda penting yang bertujuan untuk memperkasakan UA menjadi setaraf dengan universiti bertaraf dunia. Pemberian status autonomi kepada UA adalah dengan penurunan kuasa daripada kerajaan kepada Lembaga Pengarah UA.

Pada 4 Oktober 2018, kesemua 20 UA telah diberikan pengiktirafan berstatus autonomi. Ini adalah bagi memberi peluang kepada UA menentukan hala tuju masing-masing dan melaksanakan langkah-langkah bagi memastikan ia tercapai dengan cepat.

Walaupun kuasa autonomi diberikan kepada UA, bagi memastikan ianya akan dilaksanakan dengan akauntabiliti dan mempunyai *check and balance*, UA perlu mematuhi prosedur, tatacara dan pekeliling kerajaan bagi memastikan tadbir urus dilaksanakan telus, cekap, efisien dan *value for money*.

RJM155



**PEMBERITAHUAN PERTANYAAN MESYUARAT KEDUA,**  
**PENGGAL PERTAMA, PARLIMEN KEEMPAT BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : TUAN AHMAD FADHLI BIN SHAARI**  
**(PASIR MAS)**

**TARIKH : 10 DIS 2018 (ISNIN)**

**SOALAN:**

Minta **MENTERI PERTAHANAN** menyatakan langkah-langkah yang sedang diambil oleh pihak Kementerian dalam usaha memulihkan situasi membimbangkan yang sedang dialami oleh pihak tentera daripada sudut tahap kesiapsiagaan dengan kelengkapan ketenteraan yang sangat daif.

**JAWAPAN**

Tuan Yang di-Pertua,

Kementerian Pertahanan dan Angkatan Tentera Malaysia (ATM) memberi jaminan bahawa keupayaan dan tahap kesiapsiagaan aset ketenteraan negara berada di tahap yang baik dan berupaya mempertahankan kedaulatan negara, keutuhan wilayah dan kesejahteraan ekonomi negara daripada sebarang bentuk ancaman.

Di samping itu, Kementerian juga sedang mengambil beberapa langkah penambahbaikan hala tuju pembangunan ATM berdasarkan kepada ancaman semasa dan persekitaran keselamatan strategik serantau dan global yang tidak menentu melalui kajian semula Dasar Pertahanan Negara (DPN), Strategi Ketenteraan Negara dan Pelan Pembangunan Keupayaan Dimensi Keempat Angkatan Tentera Malaysia (4D MAF) yang sedia ada.

Kementerian percaya dengan adanya Pelan Pembangunan Keupayaan ATM yang berteraskan DPN yang terkini, pelan atau *roadmap* pembangunan keupayaan jangka panjang ATM yang komprehensif dengan kelengkapan yang berteknologi tinggi dan disepadukan dengan pembangunan modal insan yang berkualiti serta turut mengambilkira faktor ancaman luar akan dapat direalisasikan agar sistem pertahanan negara lebih mampan dan efisien.

**DEWAN RAKYAT**  
**PEMBERITAHUAN PERTANYAAN**  
**MESYUARAT KEDUA, PENGGAL PERTAMA**  
**PARLIMEN KEEMPAT BELAS (2018)**

---

**PERTANYAAN : LISAN**  
**TARIKH : 10 DISEMBER 2018**  
**DARIPADA : YB TUAN AHMAD MARZUK BIN SHAARY**  
**[PENGKALAN CHEPA]**  
**SOALAN : 14**

**YB TUAN AHMAD MARZUK BIN SHAARY [PENGKALAN CHEPA]** minta **PERDANA MENTERI** menyatakan usaha-usaha reformasi institusi yang telah dilaksanakan sebagaimana janji **HARAPAN** dalam Pilihan Raya Umum ke 14 lalu. Apakah halangan utama pelaksanaan janji ini, jika ada, yang dapat dikenalpasti.

**JAWAPAN: YB DATUK LIEW VUI KEONG**  
**MENTERI DI JABATAN PERDANA MENTERI**

Tuan Yang di-Pertua,

1. Ahli-Ahli Yang Berhormat, seperti mana Ahli Yang Berhormat sedia maklum, Jawatankuasa Reformasi Institusi (IRC) telah ditubuhkan oleh Majlis Penasihat Kerajaan (CEP) pada 15 Mei 2018 selepas kemenangan Pakatan Harapan dalam Pilihanraya Umum ke-14 yang lalu. IRC telah dipertanggungjawabkan mengkaji langkah-langkah dan cadangan penambahbaikan reformasi terhadap institusi-institusi penting negara ini.

2. Jawatankuasa ini dianggotai oleh lima orang ahli iaitu bekas Hakim Mahkamah Rayuan Dato' KC Vohrah; bekas hakim Mahkamah Rayuan dan Pesuruhjaya Suruhanjaya Hak Asasi Manusia (SUHAKAM) Dato' Mah Weng Kwai; Presiden Persatuan Patriot Kebangsaan (Patriot) Brig. Jen. Dato' Mohamed Arshad Raji (B); Presiden Persatuan Hak Asasi Manusia Kebangsaan (Hakam) Dato' S. Ambiga dan pakar perlembagaan dan pensyarah undang-undang Emeritus Profesor Datuk Dr. Shad Saleem Faruqi.

3. Untuk makluman Ahli-ahli Yang Berhormat, pihak Kerajaan telah pun menerima laporan oleh IRC ini dan Pusat Governans, Integriti dan Anti-Rasuah Nasional atau lebih dikenali (GIACC) telah dipertanggungjawabkan untuk meneliti dan menyelaras pelaksanaan cadangan-cadangan yang dikemukakan di dalam laporan tersebut. Sebanyak 256 cadangan telah dikemukakan yang berkaitan 9 institusi penting iaitu Parlimen, Suruhanjaya Pilihanraya, Badan Kehakiman, Jabatan Peguam Negara, Suruhanjaya Pencegahan Rasuah Malaysia, Polis DiRaja Malaysia, Jabatan Imigresen Malaysia, Suruhanjaya Komunikasi dan Multimedia Malaysia dan Suruhanjaya Hak Asasi Manusia Malaysia (SUHAKAM).

4. Daripada jumlah cadangan tersebut, sebanyak 223 cadangan adalah berkaitan dengan skop kerja governans, integriti dan pencegahan rasuah. Manakala, baki 33 cadangan adalah berkaitan dengan aspek komunikasi, media dan informasi. Untuk makluman dan perhatian Ahli Yang Berhormat, kesemua cadangan ini terlebih dahulu akan diteliti oleh Kementerian/ Agensi berkaitan sebelum dibawa ke mesyuarat Jawatankuasa Khas Kabinet Mengenai Anti Rasuah

(JKKMAR) yang dipengerusikan oleh YAB Perdana Menteri untuk membuat keputusan pelaksanaannya.

5. Sehingga kini, terdapat 49 keputusan dan inisiatif telah diputuskan oleh JKKMAR untuk dilaksanakan. Antaranya adalah pemerkasaan institusi-institusi seperti Mahkamah, Parlimen, SPRM dan Jabatan Audit Negara agar peranannya lebih berkecuali dan dapat bertindak dengan lebih bebas. Inisiatif-inisiatif lain yang dipersetujui adalah penubuhan Suruhanjaya Bebas Aduan dan Salah Laku Polis (IPCMC), peranan Biro Pengaduan Awam sebagai 'ombudsman', mekanisme perisytiharan harta dan mekanisme pelaporan penerimaan hadiah.

6. Ahli Yang Berhormat, cadangan Ahli Yang Berhormat untuk laporan tersebut didedahkan kepada umum akan hanya diputuskan setelah laporan-laporan tersebut diteliti dan diumumkan pelaksanaannya oleh Kerajaan dari semasa ke semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB PUAN NOORITA BINTI SUAL**  
**[ TENOM ]**  
**TARIKH : 10 DISEMBER 2018 (ISNIN)**

**SOALAN NO. 15**

Minta **MENTERI KESIHATAN** menyatakan perancangan dan keperluan terhadap perkhidmatan hospital di daerah kecil Kemabong yang begitu mendesak bagi menampung jumlah pesakit yang semakin bertambah dan nyatakan jumlah pesakit yang dirawat dan ditempatkan di Hospital Tenom bagi tempoh 10 tahun kebelakangan ini.

**JAWAPAN**

**Yang di-Pertua,**

Kemabong merupakan sebuah daerah kecil yang terletak di bawah pentadbiran Daerah Tenom. Pada masa ini, penduduk di Kemabong mendapat perkhidmatan kesihatan sekunder dari Hospital Tenom yang terletak 30km (32 minit) dari Kemabong dan juga di Klinik Kesihatan Kemabong. Klinik Kesihatan Kemabong mempunyai purata kehadiran harian kira-kira seramai 134 orang sehari. Perkhidmatan yang disediakan di klinik tersebut termasuklah Rawatan Kecemasan peringkat awal, Perkhidmatan Makmal, Klinik Ibu dan Anak, Klinik Remaja dan Warga Emas, Klinik Kanak-Kanak, ceramah kesihatan dan juga lawatan ke rumah.

Kementerian Kesihatan Malaysia (KKM) mengambil maklum akan keperluan penambahbaikan bagi Klinik Kesihatan Kemabong.

Sehubungan dengan itu, permohonan pembaikan telah pun dibuat dalam Rancangan Malaysia ke-11 melalui *Rolling Plan 4* (dengan izin) dan sedang menunggu kelulusan.

**Yang di-Pertua,**

Hospital Tenom merupakan sebuah hospital tanpa pakar. Hospital ini menyediakan perkhidmatan wad-wad seperti Wad Lelaki, Wad Perempuan, Wad Materniti dan Wad Kanak-Kanak. Selain itu, hospital ini juga mempunyai Dewan Bedah, Unit Pesakit Luar, Unit Hemodialisis, Unit Kecemasan, Unit Radiologi, Unit Patologi dan Tabung Darah. Pada tahun 2015, hospital ini berkapasiti 80 buah katil, dengan kadar penggunaan katil (BOR) pada tahap 36.15%. Pada tahun 2016, Hospital Tenom mencapai BOR sebanyak 39.2% dengan jumlah katil yang lebih rendah iaitu sebanyak 70 buah katil.

Jumlah pesakit yang dirawat di Hospital Tenom bagi perkhidmatan pesakit dalam bagi tempoh 10 tahun (2008 hingga 2017) secara puratanya adalah 4,000 pesakit setahun. Manakala purata jumlah kedatangan pesakit luar termasuk rawatan harian pula adalah 83,000 kedatangan setahun.

Di samping itu, dengan implementasi konsep Kluster, Hospital Tenom yang berada dalam Kluster Keningau telah dapat berkongsi perkhidmatan kepakaran dengan Hospital Keningau. Bangunan Unit Kecemasan Dan Trauma dan Bangunan Unit Pesakit Luar juga telah dinaiktaraf dan siap pada tahun 2015 bagi menampung keperluan penduduk yang mendapat rawatan di Hospital Tenom.

Justeru itu, buat masa sekarang KKM belum ada perancangan untuk mewujudkan hospital baru di daerah kecil Kemabong memandangkan Hospital Tenom masih boleh menampung keperluan Daerah Kecil Kemabong. Namun begitu, KKM akan sentiasa mengkaji keperluan peningkatan fasiliti kesihatan berdasarkan keperluan semasa penduduk setempat.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATUK SERI ISMAIL SABRI BIN YAAKOB**  
**[BERA]**  
**TARIKH : 10 DISEMBER 2018 (ISNIN)**

**SOALAN NO. 16**

**Y.B. DATUK SERI ISMAIL SABRI BIN YAAKOB [ BERA ]** minta **MENTERI KEWANGAN** menyatakan:-

- (a) berapakah hasil kutipan Tabung Harapan; dan
- (b) bagaimanakah ianya diagihkan serta kemukakan senarai penerima wang tersebut.



**JAWAPAN**

Tuan Yang Dipertua,

Untuk makluman Yang Berhormat, berikut adalah jawapan kepada persoalan yang dibangkitkan:

- a. Sehingga 10 Disember 2018 jam 3.00 petang, jumlah terkumpul Tabung Harapan Malaysia (THM) adalah sebanyak RM198,739,243.02.
- b. THM ini ditubuhkan berdasarkan peruntukan di bawah subseksyen 9 (1) Akta Tatacara Kewangan 1957 (Akta 61) dan terikat dengan Arahan Amanah termasuklah perkara-perkara yang melibatkan perbelanjaan yang dibenarkan oleh Arahan Amanah. Berdasarkan kepada Arahan Amanah THM, perbelanjaan yang dibenarkan hanyalah perbelanjaan yang melibatkan pembayaran hutang Kerajaan Persekutuan sahaja. Setakat ini tiada sebarang pengeluaran dana THM dibuat bagi tujuan pembayaran hutang. Mekanisme pembayaran hutang negara menggunakan dana ini akan dirangka dan diperhalusi oleh Jawatankuasa Akaun Amanah THM agar proses pembayaran hutang tersebut dapat dilaksanakan secara teratur, telus, berintegriti mengikut peraturan dan perundangan semasa yang berkuat kuasa.

Untuk makluman Yang Berhormat juga, selaras dengan penguatkuasaan Akta Perlindungan Data Peribadi 2010, segala maklumat dan rekod penyumbang kepada THM yang diterima oleh Maybank tidak dapat dihebahkan.

**MESYUARAT KEDUA, PENGGAL PERTAMA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : DATO' SRI BUNG MOKTAR BIN  
RADIN [ KINABATANGAN ]**

**TARIKH : 10 DISEMBER 2018 (ISNIN)**

**SOALAN : 18**

minta **MENTERI PEMBANGUNAN LUAR BANDAR** menyatakan apakah pendirian pihak Kementerian terhadap pelaksanaan projek menaiktaraf Jalan Pinangah dan Linayukan, Tongod. Adakah ianya akan diteruskan atau sebaliknya.

**JAWAPAN:**

Tuan Yang Di-Pertua,

Sepertimana makluman Yang Berhormat, Projek Naik Taraf Jalan Tongod-Pinangah, Sabah dan Projek Naiktaraf Jalan Linayukan Tongod Ke Sinaron, Keningau, Sabah telah diluluskan di bawah Rolling Plan Kedua, Rancangan Malaysia Kesebelas (RP2, RMKe-11) Tahun 2017. Projek ini telah diluluskan dengan peruntukan masing-masing sebanyak RM95.4juta dan RM320.714 juta.

Walau bagaimanapun, Kementerian Kewangan telah bersetuju supaya kedua-dua projek tersebut hanya dibenarkan pelaksanaannya dari segi kerja-kerja awalan seperti lantikan khidmat perunding, jurukur sehingga ke peringkat rekabentuk sahaja. Manakala bagi fasa projek yang melibatkan implikasi kewangan yang tinggi seperti pengambilan balik tanah, pelawaan tender dan kerja-kerja fizikal pembinaan hendaklah ditangguhkan dan dimohon semula dalam Rancangan Malaysia yang akan datang.

Pelaksanaan projek ini adalah tertakluk kepada kelulusan oleh pihak Unit Perancang Ekonomi, Kementerian Hal Ehwal Ekonomi (UPE, MEA) dan kedudukan semasa kewangan kerajaan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN STEVEN CHOONG SHIAU YOON  
[TEBRAU]**

**TARIKH : 10 DISEMBER 2018 [ ISNIN ]**

**SOALAN NO. 19**

Minta **MENTERI PERUMAHAN DAN KERAJAAN TEMPATAN** menyatakan sekiranya insinerator "sampah kepada tenaga" (WTE) diwujudkan di negara ini, **bagaimanakah pihak berkuasa boleh memastikan agar insinerator teknologi baru ini tidak merbahaya kepada penduduk**, malah memanfaatkan semua dengan tenaga elektrik yang dihasilkan.

**JAWAPAN :**

Tuan Yang di-Pertua,

1. Untuk makluman Yang Berhormat, bagi memastikan agar pembinaan loji insinerator tidak berbahaya kepada penduduk, Kementerian Perumahan dan Kerajaan Tempatan (KPKT) telah menetapkan supaya teknologi yang dipilih perlu terbukti berkesan termasuk pematuhan terhadap syarat-syarat oleh Jabatan Alam Sekitar (JAS). Pematuhan terhadap syarat-syarat JAS adalah termasuk pengendalian dan penyelenggaraan sistem kawalan pencemaran udara mengikut amalan kejuruteraan secara menyeluruh.
2. Selain itu, pelepasan bahan pencemar udara seperti dioxin dan furan juga telah ditetapkan oleh JAS untuk tidak melebihi batas kepekatan  $0.1 \text{ ngTEQ/m}^3$ . Selain daripada merawat sisa pepejal, loji insinerator ini dapat menghasilkan tenaga elektrik yang mana penjualan semula tenaga tersebut dapat membantu dalam mengurangkan kos pengoperasian dan penyelenggaraan loji tersebut kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI DR. HAJI WAN JUNAIDI BIN  
TUANKU JAAFAR [ SANTUBONG ]**

**TARIKH : 10 DISEMBER 2018 (ISNIN)**

**SOALAN NO.20**

**Dato' Sri Dr. Haji Wan Junaidi bin Tuanku Jaafar [ Santubong ]** minta **MENTERI AIR, TANAH DAN SUMBER ASLI** menyatakan sama ada Kementerian akan meneruskan penggubalan undang-undang (Akta) Warisan untuk mengatasi masalah kawalan warisan asli negara, seperti batu, hutan dan warisan asli unik negara, kalau tidak kenapa, kalau ia, bila akan di bawa ke Dewan Parlimen.

## SOALAN NO.20

### JAWAPAN:

Tuan Yang di- Pertua,

Penggubalan undang-undang (Akta) Warisan atau dikenali sebagai Rang Undang-undang Amanah Negara tidak termasuk dalam bidang kuasa Kementerian Air, Tanah dan Sumber Asli dan Kementerian ini berpandangan bahawa perkara ini boleh dirujuk kepada Bahagian Hal Ehwal Undang-undang, Jabatan Perdana Menteri selaku pihak yang bertanggungjawab mengawal selia entiti amanah negara.

Bagi mengatasi masalah kawalan warisan asli negara, perkara tersebut adalah di bawah bidang kuasa Kementerian Pelancongan, Seni dan Budaya Malaysia melalui Akta Warisan Kebangsaan 2005 [Akta 645]. Justeru, Kementerian ini telah menolak cadangan penggubalan RUU Amanah Negara dan tidak akan meneruskan cadangan tersebut.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK DR. JEFFREY GAPARI KITINGAN  
[ KENINGAU ]**

**TARIKH : 10 DISEMBER 2018 (ISNIN)**

**SOALAN NO. 22**

Minta **MENTERI PENDIDIKAN** menyatakan :-

- (a) adakah Kementerian akan meneruskan dengan penutupan Institut Pendidikan Guru (IPG) di Keningau dan Tawau, Sabah, seperti yang diputuskan oleh Kerajaan Barisan Nasional sebelum ini atau ianya akan diselamatkan oleh Kerajaan Pakatan Harapan sekarang dan dikekalkan sebagai IPG; dan
- (b) sama ada akan ditutup atau tidak, diminta penjelasan kenapa ianya akan ditutup.



**JAWAPAN**

Tuan Yang di-Pertua,

Jawapan (a) dan (b)

Selaras dengan fungsi Institut Pendidikan Guru (IPG) yang merupakan satu-satunya institusi latihan perguruan bagi bekalan guru sekolah rendah dan juga menjalankan latihan dalam perkhidmatan, IPG Kampus Keningau dan IPG Kampus Tawau masih meneruskan fungsinya sebagai pusat latihan dalam perkhidmatan. Kesemua sembilan (9) kampus IPG yang dicadangkan untuk tukar fungsi ke institusi TVET dikekalkan fungsinya sebagai pusat latihan dalam perkhidmatan (*continuous professional development*) dan juga berstatus secara Wujud Bersama (*Co-Exist*) dengan Kolej Vokasional/Politeknik dan PERMATApintar.

Maksud Wujud Bersama (*Co-Exist*) mengikut persetujuan dan terma rujukan yang dipersetujui oleh kedua-dua belah pihak adalah seperti berikut:

1. Pewujudan dua (2) entiti dalam premis yang sama;
2. Persempadanan fizikal (*demarcation*) yang jelas bagi kedua-dua entiti;
3. Pengkhususan infrastruktur dan infrasumber kepada dua entiti;
4. Penggunaan infrastruktur dan infrasumber secara guna sama;
5. Pemberatan pembahagian kedua-dua entiti berdasarkan kompleksiti, kapasiti dan keperluan; dan
6. Kesesuaian melaksanakan fungsi sedia ada dan fungsi baharu Institusi.

Sekian, terima kasih.

RJM157

**PEMBERITAHUAN PERTANYAAN DEWAN RAKYAT**

**PERTANYAAN : JAWAB LISAN**

**DARIPADA : DR. NIK MUHAMMAD ZAWAWI BIN HAJI  
SALLEH [ PASIR PUTEH ]**

**TARIKH : 10 DISEMBER 2018 (ISNIN)**

**SOALAN : 24**

**PR-1412-L02214**

**Dr. Nik Muhammad Zawawi bin Haji Salleh [ Pasir Puteh ]** minta **MENTERI KOMUNIKASI DAN MULTIMEDIA** menyatakan berapakah kes penipuan dalam talian (online) yang telah direkodkan oleh Kementerian bagi tempoh 2016 hingga suku tahun kedua 2018, khususnya berkaitan isu pencurian data peribadi, skim penipuan jual beli barang atas talian penipuan perbankan Internet dan apakah tindakan yang telah dilakukan dalam membanteras jenayah siber ini.

**JAWAPAN:**

Tuan Yang di-Pertua,

1. Untuk makluman Ahli Yang Berhormat, Kementerian Perdagangan Dalam Negeri dan Hal Ehwal Pengguna (KPDNHEP) merupakan Kementerian yang bertanggung jawab memantau, menyelia dan menguatkuasakan peraturan-peraturan berkaitan dengan urusan jual beli dalam talian.
2. Dari tahun 2016 hingga suku tahun ketiga 2018 (September), aduan berkenaan kes penipuan atas talian telah diterima oleh SKMM seperti berikut :
  - a) **750** aduan awam berkaitan aktiviti penipuan (*scam*)
  - b) **616** aduan melibatkan aktiviti jual beli dalam talian;
  - c) **86** aduan awam berkaitan aktiviti kecurian atau penyalahgunaan data peribadi; dan
  - d) **81** aduan melibatkan penipuan perbankan internet.

Tuan Yang di-Pertua,

3. Kesemua aduan berkaitan penipuan tersebut tidak temaktub di bawah bidang kuasa pihak SKMM serta Akta Komunikasi dan Multimedia 1998 [Akta 588]. Walau bagaimanapun, Kementerian Komunikasi dan Multimedia Malaysia melalui Suruhanjaya Komunikasi dan Multimedia Malaysia (SKMM) akan memberi bantuan teknikal apabila sesuatu kes dirujuk secara bertulis oleh KPDNHEP. Sesebuah laman jual beli yang menjalankan operasi urus niaga dalam talian haruslah mengikut dan tertakluk kepada peruntukan Peraturan-peraturan Perlindungan Pengguna (Urus Niaga Perdagangan Elektronik) yang telah diletakkan di bawah bidang kuasa KPDNHEP berkuatkuasa pada 1 Julai 2013.

4. KKMM melalui SKMM akan bekerjasama dengan pihak PDRM dan KPDNHEP untuk menjalankan pengesanan, perkongsian maklumat dan aspek forensik digital bagi membanteras jenayah penipuan urus niaga dalam talian.
5. Sebagai langkah untuk mengelakkan penipuan pengguna online di Malaysia, KPDNHEP telah memperkenalkan Akta Perdagangan Elektronik 2016 dan Peraturan-Peraturan Perlindungan Pengguna (Urus Niaga Perdagangan Elektronik) 2012. Semua perniagaan online turut diwajibkan untuk berdaftar dengan SSM.
6. Pihak KPDNHEP melaksanakan langkah-langkah kawalan terhadap laman perniagaan *online* seperti berikut:-
  - i. Mengalakkan peniaga online bagi mendapatkan pensijilan SSM BizTrust;
  - ii. Mewujudkan satu pasukan khas bagi pemantauan secara proaktif dan tindakan secara responsif ke atas aktiviti online;
  - iii. Menjalankan naziran dan bekerjasama dengan pengendali tapak pasar dalam talian (online marketplace operator);
  - iv. Berkerjasama dengan Suruhanjaya Komunikasi dan Multimedia Malaysia (SKMM), Polis DiRaja Malaysia (PDRM) dan CyberSecurity Malaysia; dan
  - v. Malaysia Specialist Association (MSA) dan Malaysian Advertiser Association (MAA) merupakan ahli Forum Kandungan Komunikasi dan Multimedia Malaysia (Forum Kandungan).

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AKMAL NASRULLAH  
BIN MOHD. NASIR  
[ JOHOR BAHRU ]**

**TARIKH : 10 DISEMBER 2018 [ ISNIN ]**

**SOALAN NO. 25**

Minta **MENTERI PERUMAHAN DAN KERAJAAN TEMPATAN** menyatakan **jumlah Rumah Transit di Johor (pecahan mengikut daerah), jumlah Perumahan Transit Belia mengikut daerah di Johor** dan perancangan pada masa akan datang untuk mewujudkan lebih banyak Rumah Transit di Johor.

**JAWAPAN**

Yang di-Pertua,

1. Untuk makluman Yang Berhormat, **Rumah Transit Belia** merupakan satu inisiatif yang telah diumumkan dalam Bajet 2017 dengan sasaran 10 ribu unit rumah di bandar-bandar utama seluruh negara bagi tempoh pelaksanaan 5 tahun. Perumahan Transit Belia ini terdiri daripada 2 jenis iaitu studio unit berkeluasan 400 kaki persegi dan apartmen 2 bilik berkeluasan 550 kaki persegi.
2. Antara keistimewaan **Rumah Transit Belia** adalah seperti:
  - a) Kadar sewaan unit adalah 30% lebih rendah daripada harga pasaran di mana Kerajaan telah bersetuju kadar sewa ditetapkan pada kadar RM400 sebulan bagi Unit Studio berkeluasan 400 kaki persegi dan RM550 sebulan bagi Unit 2 Bilik berkeluasan 550 kaki persegi;
  - b) Terdapat elemen *forced saving* yang akan dipulangkan kepada penyewa setelah tamat tempoh penyewaan. Simpanan ini akan dapat membantu menyediakan sebahagian deposit bagi pembelian rumah yang kekal kelak; dan
  - c) Rumah Transit Belia ini, akan dilengkapi dengan perabot asas bagi memberikan keselesaan kepada penyewa dan membantu penyewa menyimpan wang tanpa perlu membelanjakan wang simpanan bagi pembelian perabot untuk perumahan transit ini.

3. Untuk makluman Yang Berhormat juga, **Program Rumah Transit Malaysia**, bertujuan untuk memberi kemudahan perumahan secara sementara kepada pasangan muda yang telah berkahwin dan berumur antara 18 hingga 30 tahun. Program ini bertumpu di bandar-bandar besar untuk mengurangkan beban pasangan muda yang berpendapatan rendah dan berkelayakan.
4. **Rumah Transit Malaysia** ini disewakan dengan kadar sebanyak RM250.00 sebulan bagi tempoh sewaan permulaan selama tiga (3) tahun dengan opsyen lanjutan maksimum selama 2 tahun (1 + 1) tertakluk kepada prestasi bayaran sewaan penyewa dan pertimbangan rayuan untuk melanjutkan tempoh sewaan.
5. Antara syarat-syarat kelayakan pemohon **Program Rumah Transit Malaysia** adalah:-
  - a) Warganegara Malaysia termasuk pasangan;
  - b) Telah berkahwin dan berumur antara 18 hingga 30 tahun;
  - c) Tidak mempunyai rumah sendiri di kawasan / negeri rumah transit dipohon dan bekerja di kawasan / negeri rumah transit dipohon;
  - d) Pendapatan isi rumah RM5,000 dan ke bawah; dan
  - e) Tiada rekod jenayah.
6. Antara ciri-ciri **Rumah Transit Malaysia** adalah:-
  - a) Keluasan unit adalah di antara 700 hingga 850 kaki persegi;
  - b) 2 atau 3 bilik tidur, 2 bilik air, ruang tamu dan ruang dapur;
  - c) Dilengkapi dengan kipas dan lampu; dan
  - d) Kemudahan seperti dewan serba guna, ruang taska, kedai / gerai, pejabat pengurusan, tempat letak kenderaan, pagar kawasan, kawalan keselamatan, surau dan landskap.

7. Pada masa ini, Kementerian sedang melaksanakan **Program Rumah Transit Malaysia** di 2 lokasi iaitu:-
  - a) Rumah Transit Malaysia Bukit Jalil, Kuala Lumpur (632 unit).
  - b) Rumah Transit Malaysia Sg. Melana, Johor Bahru (390 unit).
  
8. Untuk makluman Yang Berhormat, pada masa ini, belum ada perancangan baharu bagi pelaksanaan Program Rumah Transit Malaysia dan Rumah Transit Belia di negeri Johor. Namun begitu pihak KPKT sedang meneliti tapak milik Pesuruhjaya Tanah Persekutuan (PTP) yang boleh dibangunkan Rumah Transit Belia secara kerjasama awam swasta, tertakluk kepada peruntukan kewangan yang disediakan oleh Kerajaan Persekutuan dengan memberikan keutamaan berdasarkan keperluan penduduk setempat dan permohonan penduduk yang berkeelayakan di kawasan tersebut.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN TUAN KHOO POAY TIONG  
[ KOTA MELAKA ]**

**TARIKH : 10 DISEMBER 2018 (RABU)**

**SOALAN NO. 26**

Minta **MENTERI PERUMAHAN DAN KERAJAAN TEMPATAN** menyatakan apakah **status dan statistik projek-projek PR1MA** mengikut pecahan negeri, termasuk jumlah yang dirancang, siap dibina, dan terbengkalai serta apakah strategi yang akan diambil oleh Kerajaan untuk meningkatkan keberkesanan dan kecekapan pelaksanaan projek PR1MA.

**JAWAPAN**

Yang di-Pertua,

1. Untuk makluman Yang Berhormat, secara keseluruhannya pada masa ini, Anggota Perbadanan PR1MA (Lembaga Pengarah) telah meluluskan sebanyak 268,537 unit kediaman PR1MA (254 projek). Jumlah kelulusan mengikut Negeri adalah seperti berikut;

Bil.	Negeri	Jumlah Kelulusan	Jumlah Projek
1.	Selangor	51,992	33
2.	WP Kuala Lumpur	9,569	9
3.	Negeri Sembilan	17,231	15
4.	Johor	23,990	26
5.	Melaka	22,514	20
6.	Perlis	3,579	6
7.	Pulau Pinang	16,514	6
8.	Kedah	21,328	24
9.	Perak	20,148	30
10.	Pahang	17,563	14
11.	Terengganu	5,047	10
12.	Kelantan	10,165	16
13.	Sarawak	18,309	16
14.	Sabah	30,028	28
15.	Putrajaya	560	1
	Jumlah	268,537	254

2. Daripada jumlah tersebut sebanyak 18,413 unit kediaman telah siap dibina dan 129,601 unit sedang dalam pembinaan. Manakala jumlah selebihnya masih lagi berada dalam fasa perancangan. Pecahan unit Kediaman PR1MA yang telah siap dibina mengikut negeri adalah seperti berikut;

Bil.	Negeri	Jumlah siap dibina
1.	Kedah	3,341
2.	Kelantan	125
3.	Putrajaya	560
4.	Kuala Lumpur	2,202
5.	Johor	1,371
6.	Perak	6,409
7.	Melaka	752
8.	Negeri Sembilan	143
9.	Perlis	231
10.	Selangor	1,065
11.	Sabah	1,014
12.	Sarawak	1,200
	Jumlah	18,413

3. Sehingga kini PR1MA tidak mempunyai sebarang projek yang terbengkalai. Malahan PR1MA menjangkakan lebih banyak projek akan memulakan pembinaan setelah memperolehi kelulusan daripada Kerajaan Negeri dan Pihak Berkuasa Tempatan (PBT) kelak. Justeru bagi meningkatkan keberkesanan dan pelaksanaan projek, PR1MA sentiasa berunding dengan semua pihak termasuklah Kerajaan Persekutuan, Kerajaan Negeri dan Agensi-Agensi di bawahnya serta PBT. Melalui kerjasama erat ini, lebih banyak kediaman PR1MA dapat dilancarkan kepada pemohon pada masa depan.

Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA PENGGAL PERTAMA,**  
**PARLIMEN KEEMPAT BELAS,**  
**MAJLIS MESYUARAT DEWAN RAKYAT**

PERTANYAAN : LISAN

DARIPADA : YB DATO' DR. NORAINI AHMAD

TARIKH : 10 DISEMBER 2018

SOALAN :

**Dato' Dr. Noraini Ahmad [ Parit Sulong ]** minta **MENTERI TENAGA MANUSIA** menyatakan sejauh manakah pihak Kementerian telah mengadakan pemantauan mengenai kewujudan syarikat-syarikat “*scammer*” yang melakukan penipuan jawatan kosong terhadap para pemohon kerja dengan menawarkan gaji yang terlalu lumayan.

PR-1412-L01670

## **JAWAPAN**

Tuan Yang Di Pertua,

1. Tiada peruntukkan undang-undang yang spesifik mengehadkan atau melarang mana-mana majikan dan pekerja memasuki suatu kontrak perkhidmatan dengan terma-terma dan syarat-syarat pekerjaan yang dipersetujui oleh kedua-dua belah pihak. Kriteria kelayakan akademik dan pengalaman menjadi keutamaan yang diperlukan mengikut kategori pekerjaan dan bersesuaian dengan jawatan yang ditawarkan tanpa sebarang sekatan termasuk dari segi tawaran gaji. Namun begitu, persetujuan majikan dan pekerja memasuki suatu kontrak perkhidmatan hendaklah tidak berlawanan dengan peruntukan-peruntukan dan peraturan-peraturan di bawah Akta Kerja 1955 (Akta 265).

2. Kementerian Sumber Manusia melalui penguatkuasaan di bawah Akta Agensi Pekerjaan Swasta 1981 (Akta 246) (pindaan) 2017 yang dikuatkuasakan oleh Jabatan Tenaga Kerja (JTK). Setiap Agensi Pekerjaan Swasta (APS) yang mengiklankan kekosongan jawatan mesti memastikan sebarang iklan berkaitan kekosongan jawatan mengandungi fakta yang betul dan boleh disahkan, tidak keterlaluan, palsu, mengelirukan atau memperdayakan. Mana-mana APS yang didapati memperdaya mana-mana pencari kerja dengan memberi maklumat palsu adalah melakukan kesalahan di bawah seksyen 28(b), Akta 246 dan apabila disabitkan, boleh didenda tidak

melebihi lima puluh ribu ringgit atau dipenjarakan selama tempoh tidak melebihi satu tahun atau kedua-duanya.

3. Bagi kes, syarikat-syarikat yang menjalankan penipuan pengiklanan, aduan oleh orang awam atau APS yang berlesen boleh dikemukakan ke mana-mana pejabat cawangan JTK yang berhampiran untuk siasatan lanjut dijalankan. Kementerian juga masa sekarang sedang menjalankan penguatkuasaan di bawah Akta 246 ini melalui pemeriksaan ke atas APS, individu, pertubuhan atau syarikat-syarikat yang menjalankan aktiviti agensi pekerjaan tanpa lesen termasuk seperti mengiklankan kekosongan jawatan. Dari tahun 2014 sehingga Ogos 2018, sebanyak 52 APS telah didakwa atas pelbagai kesalahan di bawah Akta 246 ini. Mana-mana individu, syarikat atau APS yang didapati memperdaya atau melakukan penipuan yang boleh ditakrifkan di bawah elemen-elemen pemerdagangan orang adalah melakukan kesalahan. Jabatan boleh mengambil tindakan siasatan di bawah Akta Antipermerdagangan Orang dan Antipenyeludupan Migran 2007 ( Akta 670). Antara lain aktiviti-aktiviti yang dijalankan oleh JTK adalah lawatan-lawatan promosi ke tempat pekerjaan, kaunter khidmat rakyat, dialog industri dan dialog *tripartite* yang bertujuan memupuk tanggungjawab majikan dan kesedaran pencari kerja agar tidak tertipu dengan tawaran-tawaran peluang pekerjaan yang tidak sah.

4. Sebagai inisiatif, kementerian juga telah menjalankan kajian dan menyediakan satu garis panduan Indeks Gaji (*Wage Index*) sebagai rujukan pencari kerja dan majikan untuk menetapkan had

gaji permulaan pekerja di dalam suatu perkhidmatan pekerjaan. Garis panduan berkenaan merupakan satu usaha kementerian mengesyorkan kadar gaji pokok permulaan yang setimpal dengan kemahiran yang dimiliki oleh pencari kerja. Penyelarasan mengenai kadar dan kenaikan gaji juga boleh dipersetujui melalui Perjanjian Bersama (*Colective Agreement*) antara pekerja dan majikan bagi mana-mana pekerja yang menjadi ahli kesatuan sekerja.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN JUNE LEOW HSIAD HUI  
[ HULU SELANGOR ]**

**TARIKH : 10 DISEMBER 2018 (RABU)**

**SOALAN NO. 28**

Minta **MENTERI PERUMAHAN DAN KERAJAAN TEMPATAN** menyatakan bilakah **program sokongan komuniti di pangsapuri kos rendah dan Projek Perumahan Rakyat (PPR)** bagi membantu ibu bapa yang berhadapan masalah penjagaan anak akan dijalankan dan bagaimanakah Kementerian memantau pelaksanaan program ini supaya keselamatan kanak-kanak terjamin.

.



**JAWAPAN :**

Tuan Yang di-Pertua,

1. Untuk makluman Yang Berhormat, program sokongan komuniti di Program Perumahan Rakyat (PPR) bagi membantu ibu bapa dalam penjagaan kanak-kanak telah dimulakan pertama kalinya menerusi program Mendaya Komuniti di PPR Lembah Subang 2, Petaling Jaya pada 30 September 2018. Menerusi program ini, Kerajaan telah mengenal pasti beberapa penduduk untuk menjadi sukarelawan bagi menawarkan perkhidmatan penjagaan kanak-kanak.
2. Program Anakku Anakmu ini dilaksanakan dengan kerjasama dari Jabatan Kebajikan Masyarakat (JKM), yang memberi latihan kepada sukarelawan dalam asas penjagaan kanak-kanak dan juga memberikan khidmat nasihat dalam membantu ibu bapa yang berhadapan dengan masalah dalam penjagaan anak. Program Anakku Anakmu ini akan diperluaskan ke PPR yang lain berdasarkan keperluan komuniti setempat.
3. Kementerian Perumahan dan Kerajaan Tempatan (KPKT) menubuhkan Sekretariat Muafakat Komuniti di setiap PPR yang menjalankan Program Mendaya Komuniti. Sekretariat ini akan menjalankan pemantauan secara berkala dari semasa ke semasa bagi memastikan program ini berjalan dengan lancar dalam mencapai objektif yang disasarkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATUK SERI HAJI AHMAD BIN HAMZAH**  
**[JASIN]**  
**TARIKH : 10 DISEMBER 2018 (ISNIN)**

**SOALAN NO. 29**

**Y.B. DATUK SERI HAJI AHMAD BIN HAMZAH [ JASIN ]** minta **MENTERI KEWANGAN** menyatakan prestasi dalam tempoh suku kedua dan suku ketiga berbanding dengan tempoh yang sama tahun 2017 mengenai prestasi BSKLI dari segi CI, nilai pasaran dan jual beli oleh pelabur asing, prestasi FDI, prestasi ringgit berbanding USD dan kedudukan rizab antarabangsa serta usaha untuk memperkukuhkan semula prestasi keempat-empatnya itu.

**JAWAPAN**

Tuan Yang di-Pertua,

1. Nilai ringgit berbanding dolar AS adalah lebih baik pada suku kedua 2017 (+3.1%) dan suku ketiga 2017 (+1.6%) berbanding suku kedua 2018 (-4.4%) dan suku ketiga 2018 (-2.5%). Manakala, rizab antarabangsa pada suku kedua 2018 (USD104.7 billion) dan suku ketiga 2018 (USD103 billion) adalah lebih baik berbanding suku kedua 2017 (USD98.9 billion) dan suku ketiga 2017 (USD101.2 billion).

2. Faktor utama kejatuhan nilai ringgit adalah akibat aliran keluar dana asing yang didorong oleh faktor-faktor luaran, antaranya;

- a. Ketidakstabilan pasaran dunia akibat risiko perang perdagangan (*trade war*);
- b. Kenaikan kadar faedah oleh bank pusat Amerika Syarikat menyebabkan pelabur menilai dan mengimbangi semula kedudukan portfolio mereka dalam pasaran kewangan “ekonomi sedang pesat membangun” (*emerging economies*); dan
- c. Kebimbangan mengenai risiko kesan penularan (*contagion effect*) dalam kalangan mata wang ekonomi sedang pesat membangun berikutan kejatuhan ketara peso Argentina dan lira Turki berbanding dengan dolar AS.

Tuan Yang di-Pertua,

3. Dalam keadaan persekitaran luaran yang tidak menentu, keadaan pasaran kewangan yang lebih lancar dan teratur adalah penting. Oleh itu, Kerajaan melalui Bank Negara Malaysia sentiasa menjalankan operasi pasaran dua hala dalam pasaran pertukaran asing untuk mengawal tekanan daripada aliran pelaburan modal global yang ketara dan besar bagi mengurangkan volatiliti nilai mata wang.

4. Paras rizab antarabangsa negara pula dijangka mengalami peningkatan semula selepas pasaran dunia kembali pulih dan sentimen pelabur bertambah baik. Sekiranya pertumbuhan ekonomi negara kekal kukuh dan kegusaran pelabur asing berkurang, lebihan penerimaan pertukaran wang asing akan terhasil. Pada 30 November 2018, paras rizab adalah mencukupi untuk membiayai 7.5 bulan import tertangguh dan 1.0 kali hutang luar negeri jangka pendek.

Tuan Yang di-Pertua,

5. Mengikut perangkaan Imbangan Pembayaran (*Balance of Payment*), jumlah aliran masuk bersih pelaburan langsung asing (FDI) pada suku kedua dan suku ketiga 2018 mencatat RM6.8 bilion manakala pada suku kedua dan suku ketiga 2017 aliran masuk FDI mencatatkan jumlah sebanyak RM20.4 bilion. Berdasarkan statistik Lembaga Pembangunan Pelaburan Malaysia (MIDA), dalam tempoh enam bulan pertama 2018, jumlah pelaburan bernilai RM80.3 bilion telah diluluskan berbanding RM65.4 bilion pada tempoh yang sama tahun lalu. Daripada jumlah tersebut 33% adalah pelaburan asing. Pada masa yang sama, aliran masuk FDI (BOP) berjumlah RM18.8 bilion dalam tempoh sembilan bulan pertama 2018. Sektor yang menjadi tumpuan FDI adalah pembuatan; perlombongan & kuari; pemborongan & peruncitan; maklumat & komunikasi; serta kewangan dan insurans. Antara negara yang menjadi sumber FDI yang tertinggi adalah Amerika Syarikat, Hong Kong dan United Kingdom. Perdagangan Malaysia pula telah mencecah RM1.4 trilion dan Kerajaan yakin usaha mempelbagaikan produk dan pasaran akan terus menyokong prestasi perdagangan negara.

Tuan Yang di-Pertua,

6. Berhubung prestasi indeks penanda aras Bursa Malaysia FBMKLCI pula, pada tahun 2017 indeks tersebut mencatat tahap tertinggi iaitu 1,797 mata atau peningkatan sebanyak 9.45% berbanding tahun sebelumnya. Di samping itu, FBMKLCI telah pun mencatat paras tertinggi pada 19 April 2018 iaitu 1,895

mata tetapi merosot kepada 1,692 mata pada suku kedua 2018, 4% lebih rendah berbanding suku kedua 2017. FBMKLCI kembali meningkat dan mencatat paras melebihi 1,800 mata pada 8 Ogos 2018 didorong oleh asas makroekonomi yang kukuh, pertumbuhan sektor korporat secara berterusan dan aliran masuk dana asing ke pasaran ekuiti. Pada suku ketiga 2018 setakat 30 September 2018, FBMKCLI berada di paras 1,793 mata, 2% lebih tinggi berbanding tempoh yang sama pada tahun 2017.

7. Sehubungan itu, pada tahun 2017 aliran masuk bersih dana asing mencatat sebanyak RM11 bilion. Trend ini berterusan sehingga bulan Januari 2018 yang mencatat aliran masuk bersih sebanyak RM3.3 bilion menjadikan jumlah terkumpul sebanyak RM14.3 bilion pada akhir Januari 2018. Walau bagaimanapun, mulai Februari 2018 sehingga suku ketiga 2018, pasaran ASEAN mengalami jualan yang berterusan oleh pelabur asing didorong oleh sentimen negatif yang meningkat terhadap Pasaran Membangun (*Emerging Market*). Secara keseluruhannya, pasaran tempatan menyaksikan aliran keluar bersih dana asing sebanyak RM9 bilion pada suku kedua 2018 dan RM1.6 bilion pada suku ketiga 2018.

Tuan Yang di-Pertua,

8. Dalam jangka masa panjang, prestasi ringgit, rizab negara, jumlah aliran masuk bersih pelaburan langsung asing (FDI) dan pasaran modal akan didorong terutamanya oleh kekuatan asas ekonomi negara. Sehubungan itu, Malaysia perlu menumpukan usaha untuk meningkatkan daya tahan ekonomi dengan mempelbagaikan sumber ekonomi, memperkukuh daya saing ekonomi dan kedudukan fiskal negara. Dengan ini, prestasi ringgit, rizab negara, jumlah aliran masuk bersih pelaburan langsung asing (FDI) dan pasaran modal akan terus meningkat seiring dengan pengukuhan asas ekonomi negara dan pasaran kewangan global. Pada masa yang sama, Bloomberg pada 28 November 2018 telah meletakkan Malaysia di tangga pertama dalam senarai 20 ekonomi baru muncul di dunia kerana negara mempunyai “lebih akaun semasa negara tersebut serta pertumbuhan dan penilaian ekonomi yang stabil. Data juga menunjukkan inflasi berada pada paras 0.6 peratus pada Oktober berbanding

**NO SOALAN : 29**

setahun yang lalu, berbanding hasil bon kerajaan 10-tahun sebanyak lebih kurang 4.17 peratus."

**MESYUARAT KEDUA, PENGGAL PERTAMA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : DATUK HAJI AHMAD JAZLAN BIN  
YAAKUB  
[ MACHANG ]**

**TARIKH : 10 DISEMBER 2018 (ISNIN)**

**SOALAN : 30**

minta **MENTERI PEMBANGUNAN LUAR BANDAR** menyatakan adakah program tajaan pelajar ke luar negara akan diteruskan oleh MARA, dan adakah terdapat sebarang penambahan jumlah peruntukan atau bilangan pelajar yang ditaja untuk tahun 2018 ini.

**JAWAPAN:**

Tuan Yang Di-Pertua,

Untuk makluman Yang Berhormat, MARA sentiasa fokus dalam melahirkan graduan yang profesional dan kompeten melalui kemudahan pinjaman pelajaran MARA kepada pelajar yang layak untuk melanjutkan pelajaran ke luar negara.

MARA masih meneruskan penghantaran pelajar ke luar negara melalui Program Kecemerlangan kepada pelajar-pelajar yang mendapat peluang ke universiti terpilih di luar negara.

Bagi tahun 2018, dijangka seramai 7,000 orang pelajar akan menerima kemudahan pinjaman pelajaran MARA di luar negara.

**MESYUARAT KEDUA, PENGGAL PERTAMA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : TUAN ARTHUR JOSEPH KURUP  
[ PENSIANGAN ]**

**TARIKH : 10 DISEMBER 2018 (ISNIN)**

**SOALAN : 31**

minta **MENTERI PEMBANGUNAN LUAR BANDAR** menyatakan bilakah pembinaan loji air untuk Pekan Sepulut akan dimulakan serta adakah terdapat sebarang masalah dalam memulakan projek tersebut.

**JAWAPAN:**

Tuan Yang Di-Pertua,

Untuk makluman Yang Berhormat, Projek Bekalan Air Luar Bandar (BALB) Pekan Sepulut dan Kawasan Sekitarnya, Sabah dengan kos kerja berjumlah RM 30 juta masih di dalam peringkat rekabentuk. Projek ini melibatkan pembinaan loji rawatan air dengan kapasiti dua (2) juta liter sehari, muka sauk (*intake*), tangki simpanan, tangki pengimbang dan penyambungan paip pelbagai jenis dan saiz dengan anggaran panjang 43 km.

Kementerian ini bersama Jabatan Air Negeri Sabah (JANS) dan perunding di dalam proses memuktamadkan rekabentuk konsep bagi memastikan pelaksanaan projek mempunyai *value for money* dan liputan bekalan air yang maksima. Rekabentuk terperinci akan dimulakan dalam masa terdekat dan dijangka selesai pada bulan Mac 2019. Seterusnya sedia untuk ditender pada suku kedua tahun 2019.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI DR. RONALD KIANDEE  
[ BELURAN ]**

**TARIKH : 10 DISEMBER 2018 (ISNIN)**

**SOALAN NO. 32**

Minta **MENTERI HAL EHWAL EKONOMI** menyatakan:

- a) apakah unjuran pembangunan infrastruktur yang mampu diberikan Kementerian dalam kedudukan kewangan semasa negara; dan
- b) apakah langkah-langkah yang akan diambil oleh Kementerian untuk memastikan negara mempunyai dana pembangunan yang berterusan.

**JAWAPAN**

Tuan Yang di-Pertua,

Untuk makluman Ahli Yang Berhormat, peruntukan pembangunan bagi Rancangan Malaysia Kesebelas (RMKe-11) daripada tahun 2016 sehingga 2018 adalah sebanyak RM138 bilion iaitu sebanyak RM46 bilion setiap tahun. Projek-projek yang diluluskan adalah projek-projek bersifat pembangunan infrastruktur fizikal seperti jalan raya, bangunan, jambatan, perumahan, sekolah dan sebagainya. Projek-projek yang bersifat bukan fizikal pula adalah seperti program-program latihan, pembangunan kapasiti, ICT, dana, kajian, geran, pelaburan ekuiti dan sebagainya.

Bagi tahun 2016, peruntukan pembangunan bagi projek yang bersifat kemudahan infrastruktur adalah sebanyak 68.8%, tahun 2017 adalah sebanyak 69.3% dan tahun 2018 adalah sebanyak 66%. Bagi tahun 2019 pula, adalah dianggarkan sebanyak 72% peruntukan disediakan bagi projek pembangunan infrastruktur. Oleh itu, peruntukan pembangunan bagi projek-projek pembangunan infrastruktur pada masa akan datang dianggarkan sekitar 70% daripada peruntukan pembangunan yang diluluskan.

Fungsi utama Kementerian Hal Ehwal Ekonomi (MEA) adalah untuk merangka dasar pembangunan sosioekonomi negara melalui penyediaan Rancangan Malaysia setiap lima tahun. MEA juga bertanggungjawab memperakukan projek-projek pembangunan yang akan dilaksanakan oleh kementerian-kementerian berkaitan. Bagi tahun 2019, sejumlah RM54.7 bilion peruntukan pembangunan telah diagihkan kepada setiap kementerian bagi melaksanakan 4,820 projek seluruh negara. Daripada jumlah peruntukan tersebut, sebanyak RM3 bilion diperuntukan kepada MEA bagi pelaksanaan projek-projek di bawah pemantauan MEA.

Sekian, terima kasih

10 Disember 2018  
Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN CHOW KON YEOW  
[TANJONG]**

**TARIKH : 10 DISEMBER 2018 (ISNIN)**

**SOALAN NO. 33**

Minta **MENTERI PERUMAHAN DAN KERAJAAN TEMPATAN** menyatakan **perancangan pembinaan Projek Perumahan Rakyat (PPR) berserta penyelenggaraan rumah pangsa bagi Pulau Pinang** dalam tempoh 10 tahun akan datang memandangkan negeri ini menerima bilangan unit PPR terendah iaitu hanya 999 unit (kurang 0.98%) berbanding 102,118 unit daripada jumlah keseluruhan seluruh negara kini.

**JAWAPAN**

Yang di-Pertua,

1. Untuk makluman Yang Berhormat, dari tahun 2001 hingga 30 September 2018, bagi **Program Perumahan Rakyat (PPR) di Pulau Pinang** sebanyak **4 projek (999 unit)** rumah PPR telah siap dibina iaitu:-

Bil.	Lokasi	Bil. Unit
1	PPR Lorong Selamat, Georgetown	316
2	PPR Jalan Thamby, Butterworth	382
3	PPR Kg. Tok Suboh, Seberang Perai Tengah	231
4	PPR Mak Mandin, Butterworth	70
<b>Jumlah</b>		<b>999</b>

*Senarai Projek PPR Yang Siap Dibina Di Pulau Pinang Sehingga 30 September 2018*

2. Untuk makluman Yang Berhormat juga, Kementerian Perumahan dan Kerajaan Tempatan (KPKT) sangat mengalu-alukan syor dan cadangan tapak PPR yang bersesuaian dari Kerajaan Negeri. Tapak yang dicadangkan oleh pihak Kerajaan Negeri ini, akan dinilai, berdasarkan garis panduan Unit Perancang Ekonomi, Jabatan Perdana Menteri (EPU,JPM). Tapak milik Kerajaan Negeri akan diberi keutamaan untuk melaksanakan PPR secara tender terbuka mengikut dasar yang telah ditetapkan oleh Kerajaan. Namun begitu, pelaksanaan pembangunan PPR adalah, tertakluk kepada peruntukan kewangan yang disediakan oleh Kerajaan Persekutuan dengan keutamaan kepada lokasi-lokasi yang mempunyai bilangan setingan serta permohonan rumah bagi golongan B40 yang tinggi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ABD RAHIM BIN BAKRI [ KUDAT ]**

**TARIKH : 10 DISEMBER 2018 (ISNIN)**

**SOALAN NO. 34**

Minta **MENTERI PENDIDIKAN** menyatakan bilakah proses tawaran kerja untuk projek pembinaan penggantian penuh 24 bilik darjah SK Pekan Pitas akan dapat dilaksanakan. Ini kerana bangunan sedia ada telah uzur dan perlunya projek tersebut dilaksanakan dalam kadar segera bagi mengelakkan sebarang kejadian tidak diingini.

**JAWAPAN**

Tuan Yang di-Pertua,

Kementerian Pendidikan Malaysia (KPM) sentiasa berusaha untuk menyediakan bangunan sekolah berserta kemudahan pendidikan yang sempurna bagi memastikan proses pengajaran dan pembelajaran dilaksanakan dengan efektif dalam suasana yang kondusif. KPM ingin memaklumkan bahawa projek pembinaan gantian penuh SK Pekan Pitas, Sabah telah diluluskan pembinaannya dalam *rolling plan* 1 Tahun 2016 Rancangan Malaysia Ke-11. Projek pembinaan gantian penuh 24 bilik darjah dan lain-lain kemudahan di SK Pekan Pitas akan dimulakan setelah permohonan Kebenaran Merancang mendapat kelulusan Pihak Berkuasa Tempatan. Untuk makluman Ahli Yang Berhormat, KPM telah menghantar permohonan Kebenaran Merancang kepada Majlis Daerah Pitas pada September 2017.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI MUSTAPA BIN MOHAMED  
[JELI]**

**TARIKH : 10 DISEMBER 2018 (ISNIN)**

**SOALAN NO. 35**

Minta **MENTERI HAL EHWAL EKONOMI** menyatakan apakah impak pelaksanaan pemberian royalti petroleum 20% kepada prestasi PETRONAS dan syarikat-syarikat cari gali minyak yang lain.

**JAWAPAN**

Yang di-Pertua,

Untuk makluman Ahli Yang Berhormat, dalam sebarang usaha eksplorasi dan pengeluaran yang telah dimeterai melalui Kontrak Perkongsian Pengeluaran (*PSC – Production Sharing Contract*), 10% daripada hasil pengeluaran petroleum dari kawasan kontrak diperuntukkan untuk pembayaran tunai yang biasanya dikenali sebagai royalti minyak. Jumlah 10% tersebut kemudian akan dibahagikan sama rata antara kerajaan persekutuan dan negeri pengeluar, di mana masing-masing akan mendapat 5% dari hasil pengeluaran kasar. Pembayaran tunai ini dijelaskan tanpa mengira sama ada pengeluaran dari setiap lapangan di dalam kawasan kontrak menguntungkan ataupun tidak.

Di antara impak pelaksanaan pemberian royalti petroleum 20% kepada prestasi PETRONAS dan syarikat-syarikat cari gali minyak yang lain adalah seperti berikut:

- (i) mengecilkan anggaran keuntungan minyak (*profit oil*) yang dikongsi oleh PETRONAS dan pengusaha PSC dari paras semasa iaitu dari 20% kepada 5% sebelum cukai. Memandangkan pelaburan dalam sektor hulu melibatkan risiko yang tinggi dan memerlukan modal pendahuluan yang amat besar, penurunan *profit oil* ini sudah tentu akan memberi impak yang negatif kepada pulangan pelaburan PETRONAS dan pengusaha PSC.
- (ii) Pengurangan *profit oil* yang drastik akan mempercepatkan penghujung hayat ekonomi lapangan-lapangan minyak yang sedang beroperasi. Selain daripada itu, lapangan-lapangan yang baru ditemui pula akan menjadi lebih mencabar untuk dibangunkan disebabkan oleh pulangan ekonomi yang marginal.
- (iii) Pembekalan gas dari Sabah dan Sarawak ke loji gas asli cecair atau *Liquefied Natural Gas* (LNG) di Bintulu juga akan tergugat yang seterusnya akan menjejaskan kontrak LNG jangka panjang antara PETRONAS dengan pelanggan antarabangnya. Ini sekaligus akan memberikan impak yang tidak sihat terhadap reputasi PETRONAS dan Malaysia sebagai salah satu pengeluar LNG terbesar dunia.

- (iv) Peningkatan royalti ke 20% juga akan menjejaskan daya tarikan Malaysia sebagai destinasi pelaburan bagi banyak syarikat-syarikat minyak luar negara. Ini kerana pembangunan lapangan minyak dan gas di Malaysia dijangkakan akan menjadi semakin mencabar disebabkan geologi yang semakin kompleks dan kedudukannya di laut dalam yang memerlukan modal yang besar dengan kepakaran tertentu. Untuk makluman, kini terdapat lebih daripada 40 pelabur PSC di Malaysia, yang mana 80% adalah pelabur asing.
- (v) Kekangan kewangan yang bakal dihadapi PETRONAS turut akan menjejaskan keupayaan PETRONAS untuk melabur di luar negara. Oleh kerana pembangunan minyak dan gas di Malaysia menjadi semakin rumit, pelaburan di luar negara adalah penting daripada sudut strategik bagi membolehkan PETRONAS mengimbangi portfolio perniagaannya dan memastikan kelestarian sumber petroleum yang boleh digunapakai di Malaysia.
- (vi) Pendapatan Kerajaan Persekutuan akan terjejas disebabkan kurangnya pendapatan daripada *Petroleum Income Tax (PITA)* dan keupayaan syarikat untuk memberikan pulangan dividen yang tinggi kepada Kerajaan. Kesannya, penarafan kredit untuk Kerajaan Persekutuan mahupun PETRONAS akan terjejas.
- (vii) Selain daripada impak ekonomi, terdapat juga kerumitan daripada segi undang-undang kerana perjanjian PSC sedia ada dengan jelas menyatakan pembayaran tunai maksimum adalah sebanyak 10%. Sebarang cubaan untuk meningkatkan pembayaran tunai berkemungkinan besar akan mendapat tentangan pengusaha PSC dan boleh menjurus kepada tindakan undang-undang.

Sekian, terima kasih.

10 Disember 2018  
Kementerian Hal Ehwal Ekonomi



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TIEN FATT @ WONG  
NYUK FOH [SANDAKAN]**

**TARIKH : 10 DISEMBER 2018 (ISNIN)**

**SOALAN NO. 36**

Minta **MENTERI TENAGA, SAINS, TEKNOLOGI ALAM SEKITAR DAN PERUBAHAN IKLIM** menyatakan berikutan projek Trans-Sabah *pipeline* telah dibatalkan, adakah Kementerian akan teruskan rancangan asal di mana loji penjana kuasa *Liquefied Natural Gas* akan dibina di Pantai Timur Sabah.

**JAWAPAN**

Tuan Yang di-Pertua,

Untuk makluman Ahli Yang Berhormat,

Kerajaan telah membuat keputusan untuk membatalkan pelaksanaan Projek Loji Jana Kuasa Kitar Padu Gas Berkapasiti 300MW di *Palm Oil Industrial Cluster* (POIC) Sandakan, Sabah seperti yang telah diumumkan oleh pihak Kerajaan di Dewan Rakyat pada 25 Oktober 2018. Sekian, terima kasih.

**SOALAN NO : 37**

**MESYUARAT KEDUA, PENGGAL PERTAMA  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN : LISAN**

**DARIPADA : YB TUAN WONG LING BIU**

**KAWASAN : SARIKEI**

**TARIKH : 10 DISEMBER 2018, ISNIN**

**SOALAN :**

**YB TUAN WONG LING BIU** minta **MENTERI KERJA RAYA** menyatakan berapakah fasa bagi pembinaan Lebuhraya Pan Borneo. Berapakah jumlah peruntukan yang digunakan bagi pembinaan tersebut dan bagaimanakah perkembangan atau kemajuan pembinaan Lebuhraya Pan Borneo tersebut.

**JAWAPAN :**

Tuan Yang Di-Pertua,

Sebagaimana Ahli Yang Berhormat sedia maklum, projek Lebuhraya Pan Borneo Sarawak melibatkan kerja-kerja menaiktaraf jalan sedia ada kepada 4 lorong 2 hala (*dual carriageway*) sepanjang 1,064 km dari Telok Melano hingga ke Lawas. Keseluruhan jajaran tersebut adalah termasuk jajaran yang telah dinaiktaraf kepada empat lorong dua hala sepanjang 192 km di bawah Rancangan Malaysia Lima Tahun (RMLT) dan baki 862 km projek ini dilaksanakan secara dua fasa.

Fasa 1 projek Lebuhraya Pan Borneo Sarawak melibatkan jajaran dari Telok Melano hingga ke Miri yang terdiri daripada 11 pakej dengan anggaran panjang 786km yang sedang berjalan akan terus dilaksanakan. Sehingga September 2018, prestasi kemajuan fizikal keseluruhan adalah 28.31% berbanding jadual 27.94% dengan jumlah perbelanjaan RM2.4 bilion telah dibayar kepada Kontraktor Pakej Kerja (Work Package Contractor – WPC) yang dilantik bagi kerja-kerja pembinaan. Manakala penelitian teknikal dan kewangan sedang dijalankan bagi cadangan Fasa 2 projek Lebuhraya Pan Borneo Sarawak yang tidak melalui Negara Brunei Darussalam.

Untuk makluman Ahli Yang Berhormat, mekanisma dan pelaksanaan keseluruhan projek Lebuhraya Pan Borneo Sarawak masih di peringkat penelitian semula dan akan dimuktamadkan bersama Kementerian Kewangan dan Kerajaan Negeri Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : Lisan**

**DARIPADA : Tuan Robert Lawson Chuat  
[ Betong ]**

**TARIKH : 10 DISEMBER 2018 (ISNIN)**

**SOALAN 38**

**Tuan Robert Lawson Chuat [Betong]** minta MENTERI PERTANIAN DAN INDUSTRI ASAS TANI menyatakan apakah status pelaksanaan program Sumber Kekayaan Baru (SKB) penanaman kelapa di Sarawak ketika ini.

**JAWAPAN**

**Tuan Yang Dipertua,**

Kementerian Pertanian dan Industri Asas Tani (MOA) telah memperuntukkan sejumlah RM3,578,000 di bawah Program Sumber Kekayaan Baru pada tahun 2018 bagi tujuan pembangunan industri kelapa di negeri Sarawak. Skop program ini merangkumi Skim Tanam Semula dan Baru varieti Kelapa Berhasil Tinggi selingan dengan Tanaman Jangka Pendek serta tanaman kelapa secara integrasi misalnya dengan kelulut. Bantuan yang disalurkan kepada peserta-peserta skim ini adalah dalam bentuk penyediaan tapak kawasan, bahan tanaman, baja, racun dan peralatan ladang. Nilai bantuan skim tanam semula dan baru bagi satu hektar adalah berjumlah RM14,430 untuk 4 tahun.

Selain daripada bantuan kepada para petani tanaman kelapa, program ini juga memberi bantuan untuk pembangunan stesen pengeluaran benih kelapa yang melibatkan 7 stesen pertanian di Sarawak. Sejumlah RM500,000 daripada keseluruhan peruntukan yang diterima digunakan untuk tujuan tersebut.

Ketika ini, Jabatan Pertanian Sarawak sedang mengenalpasti para petani yang layak untuk menerima bantuan berkenaan. Saringan awal telah mengenalpasti seramai kira-kira 250 peserta untuk program tanam semula dan baru serta 300 peserta untuk program integrasi. Prosedur Operasi Standard (SOP) bagi pelaksanaan program ini telah dibangunkan. Namun demikian, berlaku sedikit kelewatan dalam pelaksanaan projek ini berikutan masalah teknikal bersabit urusan penyaluran peruntukan kewangan yang melewati peruntukan diterima oleh pihak negeri Sarawak.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB PUAN RUBIAH BINTI HAJI WANG**  
**[ KOTA SAMARAHAN ]**  
**TARIKH : 10 DISEMBER 2018 (ISNIN)**

**SOALAN NO. 39**

Minta **MENTERI KESIHATAN** menyatakan usaha Kementerian bagi menambah baik mutu perkhidmatan kesihatan melibatkan penduduk pedalaman dan luar bandar yang mengalami masalah mobiliti untuk mendapatkan rawatan kesihatan.

**JAWAPAN**

**Yang di-Pertua,**

Pada masa ini KKM memiliki 145 buah hospital dan institusi khas perubatan di mana 70 adalah hospital berpakar dan 75 lagi adalah hospital tanpa pakar yang terletak di pekan kecil di kawasan luar bandar.

Beberapa inisiatif yang telah dan sedang dilaksanakan oleh KKM bagi meningkatkan perkhidmatan kesihatan bagi penduduk luar bandar meliputi:

1. Mengadakan akses perkhidmatan kepakaran bagi penduduk luar bandar melalui sistem rujukan dan lawatan berkala pakar daripada hospital berpakar yang terdekat ke hospital-hospital tanpa pakar di luar bandar atau klinik kesihatan. Pakar perubatan akan melihat pesakit di wad atau di klinik pakar, menjalankan pembedahan dan prosedur klinikal bergantung kepada keperluan.

2. Memperkenalkan inisiatif Hospital Kluster di mana hospital-hospital tanpa pakar dan hospital berpakar di dalam lokasi geografi yang sama digabungkan agar semua sumber termasuk sumber manusia, fasiliti, peralatan dan lain-lain di hospital-hospital di dalam kluster akan dikongsi dan dioptimumkan penggunaannya bagi meningkatkan akses kepada perkhidmatan kepakaran dan kualiti perkhidmatan yang disampaikan. Melalui pelaksanaan Hospital Kluster, masyarakat setempat mendapat perkhidmatan kepakaran terpilih di hospital-hospital yang berdekatan dengan tempat tinggal tanpa perlu bergerak ke hospital berpakar yang lebih jauh.
3. Mengadakan Program-program *outreach* seperti Klinik Katarak Bergerak (KKB) dan Klinik Katarak Transit (KKT). Inisiatif ini dilaksanakan disebabkan ketiadaan akses kepada perkhidmatan kesihatan terutamanya di daerah-daerah pedalaman sebelum ini. Keadaan ini sekiranya dibiarkan berterusan akan mengakibatkan pertambahan yang ketara kepada bilangan pesakit dan tempoh masa menunggu untuk pembedahan yang boleh menyebabkan kebutaan.

KKB adalah perkhidmatan yang bergerak kepada komuniti dengan menggunakan bas khas bagi menjalankan saringan mata dan rawatan untuk katarak. Perkhidmatan pembedahan katarak akan dilakukan di dewan bedah hospital tanpa pakar. Perkhidmatan ini bergerak ke setiap lokasi pada setiap bulan mengikut jajaran yang telah ditetapkan. Pada masa ini terdapat 3 Klinik Katarak Bergerak iaitu KK Bergerak Pantai Timur, KK Bergerak Zon Sarawak dan KK Bergerak Zon Utara.

KKT adalah konsep baru perkhidmatan penjagaan mata di mana ia menyediakan perkhidmatan penjagaan mata yang lengkap tetapi secara sementara di sesuatu lokasi transit. Perkhidmatan ini merangkumi saringan Katarak, *Diabetic Retinopathy*, kabur penglihatan dan glaukoma secara besar-besaran di kawasan-kawasan pedalaman dan seterusnya melakukan pembedahan

## NO SOALAN: 39

mata bagi kes-kes yang tiada komplikasi. Perkhidmatan ini akan beroperasi berdasarkan pemantauan *output* pembedahan.

Antara hospital-hospital yang telah menjalankan perkhidmatan penjagaan mata melalui KKT ialah Hospital Rompin, Hospital Besut, Hospital Setiu, Hospital Langkawi, Hospital Jempol, Hospital Tampin dan Hospital Lahad Datu.

4. KKM telah memperkasakan keperluan kelengkapan peranti perubatan di hospital-hospital luar bandar bagi menampung keperluan perkhidmatan perubatan. Daripada 2014 hingga 2018 sebanyak **RM252.5 juta** telah diperuntukan untuk perolehan peralatan perubatan bagi tujuan penggantian aset perubatan lama mahupun perolehan peralatan perubatan baru.

Berikut adalah pecahan peruntukan bagi peralatan perubatan yang diturunkan ke seluruh negara bagi Hospital Tanpa Pakar dan Hospital Berpakar Minor untuk tahun 2014-2018:

- i) Tahun 2014 - RM88,972,220;
- ii) Tahun 2015 - RM107,664,192;
- iii) Tahun 2016 - RM42,951,098;
- iv) Tahun 2017 - RM3,020,309; dan
- v) Tahun 2018 - RM9,935,036.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AHMAD TARMIZI BIN SULAIMAN  
[ SIK ]**

**TARIKH : 10 DISEMBER 2018 (ISNIN)**

**SOALAN NO. 40**

Minta **MENTERI PERTANIAN DAN INDUSTRI ASAS TANI** menyatakan hasrat Kementerian untuk memiliki SSL (Self-Sufficiency Level/tahap sara diri) melebihi kadar sekarang iaitu 80% sahaja bagi pertanian padi, dan adakah ianya penting untuk keselamatan, geopolitik dan strategik negara.

**JAWAPAN**

Tuan Yang Dipertua,

Kementerian mensasarkan 80% SSL menjelang tahun 2020, manakala baki 20% akan diimport bagi menampung kekurangan pengeluaran beras dalam negara dan memenuhi permintaan terhadap beras-beras premium dan beras 'speciality' seperti basmathi dan japonica. Pada tahun 2017, SSL negara adalah 71.4%.

Kerajaan sentiasa berusaha untuk meningkatkan kadar SSL kerana ia adalah penting untuk menjamin keselamatan, geopolitik dan strategik negara.

Sekian, terima kasih.

**PEMBERITAHUAN PERTANYAAN MESYUARAT KEDUA,**  
**PENGGAL PERTAMA, PARLIMEN KEEMPAT BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : DATUK WILSON UGAK ANAK KUMBONG**  
**(HULU RAJANG)**

**TARIKH : 10 DIS 2018 (ISNIN)**

**SOALAN:**

Minta **MENTERI PERTAHANAN** menyatakan adakah pihak Kementerian bercadang untuk membina kem tentera di kawasan Empangan Bakun dan Empangan Murum untuk menjaga keselamatan empangan-empangan tersebut.

**JAWAPAN:**

Tuan Yang di-Pertua,

Kementerian Pertahanan belum merancang untuk membina kem tentera di kawasan yang dinyatakan. Buat masa sekarang, fokus keselamatan kawasan yang sedang diberi tumpuan adalah kepada keselamatan di Pantai Timur Sabah di mana Tentera Darat telah menubuhkan Briged Ke-13 Infantri (ESSCOM) yang kini sedang berpangkalan di Lahad Datu, Sabah. Namun begitu, Kementerian Pertahanan akan melihat keperluan ini dari semasa ke semasa. Sekiranya keadaan memerlukan kehadiran Tentera Darat di sana, satu kajian terperinci akan dilaksanakan untuk menempatkan kem tentera di kawasan itu.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA PENGGAL PERTAMA,**  
**PARLIMEN KEEMPAT BELAS,**  
**MAJLIS MESYUARAT DEWAN RAKYAT**

PERTANYAAN : LISAN

DARIPADA : YB DATO' SERI TIONG KING SING

TARIKH : 10 DISEMBER 2018

SOALAN :

**Dato' Seri Tiong King Sing [ Bintulu ]** minta **MENTERI TENAGA MANUSIA** menyatakan apakah dasar baru pengambilan pembantu rumah asing akan diperkenalkan atau ditambah baik memandangkan dasar yang sedia ada amat menyulitkan pemohon tetapi sekadar menguntungkan agensi pembantu rumah.

PR-1412-L02439

## **JAWAPAN**

Tuan Yang Di Pertua,

Kerajaan sentiasa mengambil langkah mengkaji dasar penggajian pekhidmat domestik asing dari semasa ke semasa bertujuan untuk menambahbaikkan pengurusan penggajian kategori tersebut di Malaysia. Pelbagai inisiatif telah dan sedang dibangunkan oleh Kerajaan seperti berikut:

- (i) Kementerian Sumber Manusia sedang membangunkan Garis Panduan Pengambilan, Penggajian dan Penghantaran Pulang Pekhidmat Domestik Asing yang akan merangkumi keseluruhan elemen berkaitan kos pengambilan di negara sumber dan di Malaysia, proses dan prosedur, tanggung jawab majikan, agensi pekerjaan swasta dan pekhidmat domestik dan sebagainya;
- (ii) meminda Akta Agensi Pekerjaan Swasta 1981 (Pindaan 2017) yang memberikan liabiliti kepada agensi pekerjaan swasta untuk lebih bertanggungjawab kepada majikan dan pekhidmat domestik yang digajikan. Liabiliti adalah dari segi lesen mengikut kategori pengambilan pekerja bukan warganegara, bon dan penetapan fi perekrutan pada kadar satu bulan gaji pekerja bukan warganegara; dan

- (iii) mengadakan perbincangan bilateral dengan negara sumber bagi mewujudkan saluran pengambilan yang efektif.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATUK SERI PANGLIMA WILFRED**  
**MADIUS TANGAU [ TUARAN ]**  
**TARIKH : 10 DISEMBER 2018 (ISNIN)**

**SOALAN NO. 43**

Minta **MENTERI KEWANGAN** menyatakan adakah Kementerian meneruskan projek menaik taraf Pelabuhan Sepanggar dengan peruntukan Kerajaan Persekutuan yang sudah pun diluluskan oleh kerajaan terdahulu.

**JAWAPAN**

Tuan Yang di-Pertua,

Untuk makluman Ahli Yang Berhormat, Kerajaan telah memutuskan projek-projek pembangunan yang belum dikeluarkan Surat Setuju Terima (SST) ditangguhkan pelaksanaannya pada tahun ini termasuklah projek menaik taraf Pelabuhan Sepanggar disebabkan oleh kekangan kewangan Kerajaan pada tahun semasa.

Walau bagaimanapun, projek ini akan diteruskan pelaksanaannya pada tahun 2019 dengan peruntukan yang diluluskan berjumlah RM50 juta.

**PEMBERITAHUAN PERTANYAAN BAGI JAWAPAN LISAN**  
**MESYUARAT PERTAMA, PENGGAL KEDUA,**  
**PARLIMEN KEEMPAT BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : YB DATO' SRI AZALINA OTHMAN SAID  
[PENGERANG]**

**TARIKH : 10 Disember 2018 (Isnin)**  
**MENJAWAB**

**SOALAN : 44**

**YB DATO' SRI AZALINA OTHMAN SAID [PENGERANG]** minta **PERDANA MENTERI** menyatakan kelewatan Kerajaan dalam membuat pindaan kepada Akta Membaharui Undang-Undang (Perkahwinan dan Perceraian) 1976 [*Akta 164*] dengan memasukkan cadangan fasal 88A yang telah digugurkan oleh Kerajaan terdahulu kerana percanggahan dengan kes Mahkamah Persekutuan yang mana ianya tidak lagi bercanggah setelah kes M Indira Gandhi diputuskan.

**JAWAPAN: YB DATUK LIEW VUI KEONG**

**MENTERI DI JABATAN PERDANA MENTERI**

Tuan Yang di-Pertua,

1. Rang Undang-Undang Membaharui Undang-Undang (Perkahwinan dan Perceraian) (Pindaan) 2016 [D.R. 20/2016] ("RUU 2016") yang mengandungi seksyen baharu 88A, iaitu berkenaan dengan agama anak yang belum mencapai umur lapan belas tahun, telah dibentangkan untuk bacaan kali pertama di Dewan Rakyat pada 21 November 2016. Walau bagaimanapun, RUU 2016 itu telah ditarik balik oleh Kerajaan pada 7 Ogos 2017 kerana seksyen baharu 88A yang diperuntukkan dalam RUU 2016 itu bercanggah dengan tafsiran '*parent*' menurut Fasal (4) Perkara 12 Perlembagaan Persekutuan yang ketika itu ditafsirkan sebagai bermaksud mufrad (*singular*), iaitu ibu atau bapa oleh Mahkamah Persekutuan dalam kes Subashini a/p Rajasingam v. Saravanan a/l Thangathoray [2008] 2 MLJ 147. Tafsiran "*parent*" sebagai mufrad (*singular*) tersebut turut diputuskan oleh Mahkamah Rayuan dalam kes Pathmanathan Krishnan v. Indira Gandhi Mutho & Other Appeals [2016] 1 CLJ 911 dan Mahkamah Tinggi masing-masing dalam kes Shamala Sathiyaseelan v. Dr Jeyaganesh C Mogarajah & Anor [2004] 2 MLJ 648 dan Nedunchelian V Uthiradam v. Nurshafiqah Mah Singai Annal & Ors [2005] 2 CLJ 306.

2. RUU 2016 itu kemudiannya telah digantikan dengan Rang Undang-Undang Membaharui Undang-Undang (Perkahwinan dan Perceraian) (Pindaan) 2017 [D.R. 33/2017] ("RUU 2017"). RUU 2017 tersebut yang tidak mengandungi seksyen baharu 88A telah



dibentangkan dan seterusnya diluluskan oleh Dewan Negara pada 21 Ogos 2017.

3. Walau bagaimanapun, dalam kes Mahkamah Persekutuan yang terkini, iaitu kes Indira Gandhi A/P Mutho v. Pengarah Jabatan Agama Islam Perak & Ors. And Other Appeals [2018] 1 MLJ 545, mahkamah telah mentafsirkan perkataan “*parent*” dalam Fasal (4) Perkara 12 Perlembagaan Persekutuan sebagai bermaksud jamak (*plural*), iaitu kedua-dua ibu dan bapa dan ia terpakai jika kedua-dua ibu dan bapa masih hidup. Sebagai undang-undang utama Persekutuan dan berdasarkan prinsip *stare decisis*, tafsiran Mahkamah Persekutuan mengenai perkataan “*parent*” dalam Fasal (4) Perkara 12 Perlembagaan Persekutuan tersebut akan mengikat mahkamah bawahan dan mengatasi mana-mana undang-undang lain yang berkuat kuasa. Oleh itu, tafsiran ini dapat mengatasi isu penukaran agama anak secara sebelah pihak (*unilateral*) oleh salah seorang ibu atau bapa yang memeluk agama Islam dan tiada lagi keperluan untuk memasukkan seksyen baharu 88A ke dalam Akta Membaharui Undang-Undang (Perkahwinan dan Perceraian) 1976.

Sekian, terima kasih.

## **PEMBERITAHUAN PERTANYAAN DEWAN RAKYAT**

**PERTANYAAN : JAWAB LISAN**

**DARIPADA : YB DATO' SERI HAJI ABDUL HADI BIN AWANG**

**TARIKH : 10 DISEMBER 2018 (ISNIN)**

**SOALAN : 45**

**Dato' Seri Haji Abdul Hadi bin Awang (Marang)** minta **PERDANA MENTERI** menyatakan apakah hasil prosiding siasatan Jawatankuasa Kira-Kira Wang Negara (PAC) berhubung 'kehilangan' dana bayaran balik Cukai Barang dan Perkhidmatan (GST) bernilai kira-kira RM18 bilion.

**JAWAPAN: YB DATUK LIEW VUI KEONG**

**MENTERI DI JABATAN PERDANA MENTERI**

Jawatankuasa Kira-Kira Wang Negara (PAC) Parlimen Malaysia telah mengadakan lapan prosiding membabitkan Tuntutan Tunggakan Bayaran Balik Cukai Barang dan Perkhidmatan (GST) pada Rabu, 12 September 2018 dan menamatkan prosidingnya pada Rabu, 14 November 2018.

Pada masa ini, PAC Parlimen Malaysia dalam proses menyediakan Laporan Jawatankuasa Kira-Kira Wang Negara Parlimen Malaysia berhubung Tuntutan Tunggakan Bayaran Balik GST yang akan dibentangkan dalam Majlis Mesyuarat Dewan Rakyat.

Sekian. Terima kasih